

Eprêw Ijaew hwÿr kagà

Kagà ja na pre Ijaew ò amnhĩ kwÿjê mã hipêx nom mẽ pahte hipêx xwÿnh nhĩxi mar kêt. Na pre tanhmã hamaxpêr to nê amnhĩ nhĩxi hã kagà hkêt nê. Apu Pawre rÿ apu axtem mēhōja na pre hipêx. Ijaew kwÿjaja uràk nê Jejus kôt amnhĩ xunhwÿr xwÿnhjê mã na pre hipêx nê mẽ hwÿr kumê. Ijaewjaja mẽ hixi hō pê Eprêw. Jakamã nhũm kagà nhĩpêx xwÿnhja mẽ hwÿr hipêx nê kumê. Nê kamã mẽ kãm mẽmoj jarēnh rax nê tanhmã Jejus jarēnh to.

Nê mẽ hkwÿjaja hkwÿjê hkĩnhã kãm Jejus prãm kêt jakamã na prem hkaga nê mẽ kot amnhĩ nhĩpêx tũm o ujanār prãm xàj tanhmã mẽ homnuj to ho pa. Jakamã nhũm kagà nhĩpêx xwÿnhja tanhmã ja hã mẽ kãm kapêr to.

Nê na pre tanhmã Tĩrtũm nhõrkwÿ kaàkre hã kagà hto. Nê kaxkwa kamã õrkwÿ mexja nhũm tanhmã hã kagà hto nê mex o õrkwÿ kaàkre jakrenh ã harê.

Nê mẽ kot Jejus ã amnhĩ xà htÿx kamã hamak o pa htã mẽ kot tee ri ja hã amnhĩ pumunh nê Jejus kaga nê mẽ hkurê kamã hihtÿx nê. ã mēhōja mẽ kãm kapêr anê nê hã kagà nê mẽ hwÿr kumê. Nê mẽ kãm kapêr o:

¹ Pa Kris kôt ixkwÿjaja? Xà mẽ amex? E ot pa mẽ amã kagà nhĩpêx nê mẽ awÿr kumê. Amnepêm Tĩrtũm na pre mẽ panhĩgêtjê hwÿr ÿ hã kapêr jarēnh o ri mẽ pa xwÿnhjê rē nhũm mẽ xatã

mê kãm kapêr jarênh o ri mê hkôt pa. Ahpÿnhã tanhmã mê kãm kapêr to ho amnhĩrĩt o mê hkôt pa. Nhũm Tĩrtũm xatã mê hkanrêhã mê hkra nê mê htãmnhwÿjê hwÿr mê hkwÿjê rê nhũm mê kãm kapêr jarênh o ri mê hkôt pa. Nom mê kãm kapêr piitã harênh kurê kumrêx kêt nê. Na prem ãm hkwÿ pix jarê. Tã nhũm hpãnhã mê hkwÿjaja wantajê mÿr pê mê hwÿr mra nê axte mê kãm hkwÿ jarênh o ri pa. Jao ra mê kãm harênh jatur xãm mênh o mō.

²⁻³ Tã nhũm Tĩrtũm Kraja mê pahwÿr wrÿ nê mê pamã kapêr jarênh jatur xãm kumê. Kêp Tĩrtũm Kra jakamã te kot amnhĩ nhĩpêx pyrã nê pa. Uràk nê mex o mex. Nê wa hihtÿx xàja tipxi. Nê wa àhpumunh tÿxja mãânên tipxi. Jakamã mê pahte pano ho Tĩrtũm pumunh kêt tã Jejus pumunh pê te mê pahte Tĩrtũm pumunh pyrãk. Uràk nê kot amnhĩ to rax o mê pahpiitã mê pajakrenh par. Amnepêm kormã mêmōj kêt ri nhũm Jejus Tĩrtũm kukwak ri mêmōj piitã ho kator pa. Tã koja Tĩrtũm nhÿrmã kãm mêmōj piitã òr pa. Kaxkwa kamã mêmōj piitã nê jar pika piitã hkôt nhũm kãm piitã òr pa.

Nê Jejus xàhpumunh xà pix kukwak ri na mêmōja arĩ rãhãã. Na pre mê panê mê pahte amnhĩ tom-nuj piitã hpãnhã amnhĩrer par kaxyw mê panê ty. Hãmri akupÿm htĩr hãmri nê ma akupÿm kaxkwa hwÿr api. Tĩrtũm xihtÿx o hihtÿx xwÿnhja wÿr akupÿm api. Nê ò krĩ kamã upôk rũm pahĩ maati hkrĩ xã hã kuri hkrĩ ho hkrĩ. Nê ìhkô hã mê pahto amnhĩptàr rãhã ho hkrĩ.

Jejus mê Tĩrtũm kapêr o mê wrÿk xwÿnhjê jarênh

4-5 Nê Jejus kot amnhĩ to rax o Tĩrtũm kapêr o mẽ wryk xwỳnhjê jakrenh jakamã na pre ã Tĩrtũm kãm kapêr anê nê kãm:

Na ka amnhĩ to rax o mẽ kot ixkapêr o mẽ wryk xwỳnhjê jakre.

Mẽ kot inhmã tanhmã amnhĩ nhĩpêx to ho mẽ pa xwỳnh na mẽ.

No mẽ kurom apê Ixkra kumrêx jakamã amex o ate mẽmoj piitã hakrenh par.

Nê apê pika nhõ xwỳnhjê hwỳr ixte amênh mã xwỳnh na ka. Nà apê Ixkra kumrêx.

Kot paj jarãhã ixpê anhĩpêêxà hã mẽ piitã mẽ kãm amnhĩ to amnhĩrĩt. Pa na ixpê anhĩpêêxà.

Anhỹr o Kra Jejus mã kapêr. Na pre kapêr o mẽ wryk xwỳnhjê mã ã kapêr anhỹr kêt nê. Jejus mã pix mã ã kapêr anê.

6 Nê koja nhỹrmã akupỹn mẽ pahwỳr Kra mẽnh kaxyw hãmri nê kapêr o mẽ wryk xwỳnhjê mã kãm: E ota Ixkrata. Ixkra kumrêx na. Kot amnhĩ to rax o mẽ piitã mẽ hakrenh par.

Jakamã kêr ka mẽ apiitã kutã arôrôk nê kãm mex o mex ã harê.

Anhỹr o mẽ kãm kapêr.

7 Nê kapêr o mẽ wryk xwỳnhjê na pre axtem tanhmã mẽ harênh to nê mẽ harênh o:

Ixkapêr o mẽ wryk xwỳnhjaja na pa hte nhỹhỹm mẽ kurê nhũm htem inhmar xà hkôt ma nhỹhỹm mra nê inhmã tanhmã amnhĩ nhĩpêx to.

Te ixte ma nhỹhỹm kôk nê kuwyja mẽnh nhũm ixkapêr kôt nhỹhỹm môrja pyrak.

Anhỹr o mẽ harê.

⁸ No ã Krata jarënh anhÿr kêt nê. Na pre tanhmã kãm kapër to nê amnhĩ pyrà nê kêp Tĩrtũm ã harê nê kãm:

Pa Tĩrtũm? E ka kot kaj mẽ ho amnhĩptàr rãhã ho akrĩ. Nê akatàt kôt mẽ ho amnhĩptà.

⁹ Koja mẽ tãm amnhĩ nhĩpêx ka ja hã mẽ omu nhũm ja amã mex nê.

No koja mẽ tanhmã amnhĩ tomnuj to ka ja hã mẽ omu nhũm ja apê omnuj nê. Mẽ kot tanhmã amnhĩ tomnuj to ho paja na omnuj tÿx.

Tã ate inhmã hprãm xà hkôt amnhĩ nhĩpêx jakamã na pa mẽ kaxyw axãm ka akĩnh kãm mẽ ho amnhĩptà.

Ixpê anhõ Tĩrtũm na pa ã amã ixkapër anê. Anê.

¹⁰ Hãmri nê kãm:

Pa Pahihti. Nà amnepêm kormã mẽmoj kêt ri na ka pre ixkukwak ri pika nê kaxkwa ho akato. ãm hãmri na ka pre ã amnhĩ nhĩpêx anê.

¹¹ Tã nom koja nhÿrmã hamê wa hapêx pa. ãm kaxipix kot kaj kurom arĩ arãhãã nê aa ajapêx kêt nê.

Kaxkwa nê pika koja wa nhÿrmã te ixkre hã pô htũm kot amnhĩ nhĩpêx pyræk.

¹² Kot kaj wa hipêx o te mẽ kot ixkre nê pô htũm mã hikranh par nê hpãnhã hã nyw janhõr pyræk.

Jao pika nê kaxkwa htũm o ajapêx pa nê hpãnhã nyw nhĩpêx. Kaxkwa nyw nhĩpêx nê pika nyw nhĩpêx.

Nom kot kaj pika nê kaxkwa tũmta pyrà nê aa awej nê axirerek kêt nê.

Kot kaj arĩ anyw nê axihtỳx rãhã apa ho apa nê aa
ajapêx kêt nê. Arãhã atĩr tũm nê apa ho apa
xwỳnh na ka.

¹³ E jar inhĩhkô hã nhỹ nê inhmã mẽ ho amnhĩptàr
o akrĩ.

Kot paj mẽ kãm akurê xwỳnhjê pynênh pa nê man
awỳr mẽ o mra nê anhĩhkram mẽ haxàr pa.
Anê.

Ã na pre Tĩrtũmja Kra Jejus mã kapêr anê. No kapêr
o mẽ wrỳk xwỳnhjê mã ã kapêr anhỹr kêt nê.

¹⁴ E kot paj hpãnhã ixprĩ hã mẽ amã Tĩrtũm kapêr
o mẽ wrỳk xwỳnhjê jarê ka mẽ inhma. Tĩrtũm mã
na htem tanhmã amnhĩ nhĩpêx to ho pa. Na hte
nhỹrmã kuri mẽ htĩr tũm nê mẽ pa mã xwỳnhjê
hwỳr mẽ kurê nhũm mẽ ma mẽ hwỳr wrỳ nê
tanhmã mẽ ho ajuta hto ho pa. Na htem ã amnhĩ
nhĩpêx anhỹr o pa.

2

Mẽ pahte Jejus kaga hkêt ã mẽ pamã karõ

¹ Tã ã Tĩrtũmja Kra kot amnhĩ to rax o kapêr o mẽ
wrỳk xwỳnhjê jakrenh ã harênh kot anhỹr jakamã
kwa kêr pu mẽ kapêr mar tỳx rãhã nê hkôt pix
mã amnhĩ nhĩpêx o papa. Kot pu mẽ ho anhỹr kêt
hãmri nê gaa nê hkaga.

² Na pre Tĩrtũm kapêr o mẽ wrỳk xwỳnhjaja am-
nepê mã mẽ panhĩgêjtê hwỳr wrỳ nê Tĩrtũm nhỹ
hã mẽ kot tanhmã amnhĩ nhĩpêx to ho pa hã mẽ
kãm karõ nê ma akupỳm api. Nê katàt kôt ri mẽ
kãm Tĩrtũm kapêr jarênh o pa. Hãmri nhũm mẽ kot
hkôt amnhĩ nhĩpêx nê mar mex xwỳnhjaja nhũm
mẽmoj mẽ kãm mex nê. No nhũm mẽ kot mar nê
ãm mar xwỳnhjaja koja mẽmoj mẽ kêp omnuj nê.

³ Koja nhÿrmã mêmoj mē kêp omnuj tÿx kumrêx nhÿm mē tee ri amnhÿ tã omu nê tee ri kêp amnhÿptâr prãm kaprÿ nê mex kêt nê pa. Nom mē kot Tÿrtÿm kapêr mar tÿx xwÿnhjaja koja mêmoj mē kãm mex o mex. Koja Tÿrtÿm amnhÿ katut kôt mē kot amnhÿ tomnuj rênh pa nê axte kãm hamaxpêr kêt nhÿm mē kuri htÿr tÿm nê mex rãhã nê pa ho pa. Na pre Pahihti Jejus mē kot kapêr mar o kuhê xwÿnhjê kumrêx mã ã ja jarênh anê nê mē kãm:

—Nà kot kaj mē amnhÿ kaxyw inhmã ajamaxpêr nhÿm Tÿrtÿm ixtã mē apumu nê mē anê mē ate amnhÿ tomnuj piitã ho hapêx pa nê axte kãm hamaxpêr kêt nê. Anê.

Hãmri nhÿm mē kot kapêr mar nê hkôt mē pa ho mē pa nê xwÿnhjaja mar tÿx nê amnhÿ xô ri mē pamã harênh o ri pa. Nê mē pamã:

—Nà ãm hãmri. Nà ã ja jarênh kot anhÿr. Anê.

⁴ Hãmri nê mē pamã aa mē pahte mêmoj pumunh kêt kwÿ ho anhÿr o ri mē pahkôt pa. Tÿrtÿm Karô kot ja kaxyw mē ho mē àhpumunh tÿx jakamã nhÿm mē ÿ hã ahpÿnhã tanhmã mē pamã amnhÿ nhÿpêx to ho pa. Mē pahte ja hã mē omunh nê kamã pano puma kaxyw. Nê ã mē pajamaxpêr anê nê pajamaxpêr o:

—Nà ãm hãmri na mē pamã ã Jejus jarênh anê nê ÿ hã ã amnhÿ nhÿpêx anhÿr o pa.

Anhÿr o pajamaxpêr kaxyw na prem ã mē pahkôt amnhÿ nhÿpêx anhÿr o pa.

*Mê pahpê Jejus tō nê htōx ã mē pajarênh
Juãw 1.14; Rômãn 8.3-4; Piripos 2.5-11; Korosê
2.9; Wam Juãw 4.2*

⁵ Nê na pre Tîrtûm amnhî kukamã tanhmã amnhî jarênh to nê nhÿrmã kot akupÿm mẽmoj piitã ho nyw nê tãm mẽmoj piitã ho amnhîptàr o pa hã amnhîjarê. No na pre kapêr o mẽ wrÿk xwÿnhjê mã ã mẽ kot amnhî nhîpêx anhÿr ã mẽ kãm karõ hkêt nê. Koja jajaja mẽ pahto amnhîptàr o pa hkêt nê.

⁶ Tîrtûm kapêr ã kagà htûm kot ja jarênh kot: Kwa Tîrtûm. Nà ãm hãmri na ka hte pika ja kamã ri mẽ ixpa xwÿnhjê jamãr mex rãhã ho apa. Akînhã amarî ri mẽ ixpa xwÿnh tã amã mẽ ijapêê. Nê mẽ ixkutã anojarêt rãhã ho apa.

⁷ Na ka hte tanhmã mẽ inhîpêx to pa mẽ te mẽ ixpê akapêr o mẽ wrÿk xwÿnhjê pyrãk. Jao mẽ uràk nê akukwak ri mẽ inhmex nê ixpa ho ixpa.

Mẽ uràn mẽ ixàhpumunh nê ixihtÿx kêt tã mẽ inhmex nê ixpa.

⁸ Na ka pre ra ate mẽmoj to akator xwÿnh piitã mẽ inhîhkram haxà.

Nà ãm hãmri na ka pre ã mẽ inhîpêx anê Tîrtûm. Amex o amex. Anê.

Na pre ra mẽmoj piitã mẽ panhîhkram haxà. Pika nê kaxkwa nê kapêr o mẽ wrÿk xwÿnhjaja nê mẽkarõmnuti nê kot mẽmoj piitã hipêxja nhûm mẽ panhîhkram haxàr pa. Mẽ pahte îhkô hã ho amnhîptàr o papa kaxyw. No na pu mẽ kormã piitã ho amnhîptàr kêt nê.

⁹ No kêt Jejusja na Tîrtûm mẽ pakurom îhkram mẽmoj piitã haxàr par kumrêx. Kormã pika ja kamã ri pare ri na pre tanhmã amnhî nhîpêx to nê Tîrtûm kapêr o mẽ wrÿk xwÿnhjê hkînhã te amnhî to grire pyrã nê amnhî xà htÿx kamã hamak kãm

ty. Tirtûm kãm mẽ pahto mex prãm xàj ã mẽ pah-piitã mẽ panê htyk anê. Tã nhũm Tirtûm akupÿm ho htĩr nê akupÿm amnhĩ wÿr ho api nê kêp Pahi Maati mex o mex ã harê. Na pre ã Jejusja mẽ panê amnhĩ nhĩpêx anê nhũm Tirtûm ja hã omu nê kukwak ri mẽ pahto mex nê.

¹⁰ Nê Tirtûm kot mẽmoj piitã ho kator jakamã mẽmoj piitã õ na. Na pre mẽ pakukamã hamaxpêr o:

—Inhmã ixkra xohtô hprãm. Kot paj nhÿrmã man amnhĩ wÿr mẽ ho api kê mẽ ixri mex rãhã nê pa ho pa. Nà kot paj ã mẽ hipêx anê. Nê Ixkra Jejus koja kêp mẽ õ Pahihti. Koja mẽ urak nê mẽmoj punuj pumunh o pa hãmri nê à htÿx kamã hamak o kêp mẽ õ Pahihti mã tãm. Anê.

¹¹ Na hte Jejus mẽ panê mẽ pahte amnhĩ tom-nuj rê nê hpãnhã mẽ pamã mẽ pahte amnhĩ nhĩpêx nyw jagjê nhũm Tirtûm ja hã mẽ pah-pumunh kôt mẽ pahto hkra. Kêp Jejus Nhĩpêêxà nê kêp Mẽpanhĩpêêxà maati jakamã nhũm Jejusja mẽ pahpê htõ nê mẽ pahpê htõx ã mẽ pajarê nê mẽ panhÿ hã hkĩnh nê.

¹² Tirtûm kapêr ã kagà htũm ã mẽ pajarênh kot anhÿr. Kamã Jejusja Mẽpanhĩpêêxà maati mã mẽ pajarênh kot:

Koja ixtõ nê ixtõxjaja akapêr mar kaxyw axpên wÿr akuprõ pa ma mẽ hkôt mra nê mẽ kãm akapêr jarê nê mẽ ãhkô hã amex ã gre. Anê.

¹³ Hãmri nê kãm:

Kot paj amnhĩ kaxyw akôt pix mã ijamaxpêr mex o ri ixpa. Anê.

Hãmri nê hpãnhã kãm:

Ot pa akrajê hkôt ri ixpa ho ixpa.

Ka na ka pre mẽ kêp ixtõ nẽ ixtõx kaxyw inhmã mẽ agõ.

Koja mẽ ixpyrà nẽ amnhĩ kaxyw amã hamaxpêr rãhã ho pa Tĩrtũm. Anẽ.

¹⁴ Nẽ mẽ pahpê pika nhõ xwỳnhjaja na pu htem ãm ri panhĩ pix ã papa. Nẽ panhĩ kamã pahkamrô hã ri papa. Jakamã na pre Jejus kot mẽ panê htyk kaxyw mẽ pahwỳr wrỳ nẽ mẽ pahpyrà nẽ ã ho mẽ pakamã kato. Tã mẽmo kaxyw na pre ã ho ã nẽ mẽ pahkôt pa? Nà ã ho htyk o Satanasti pẽ hihtỳx xà ho hapêx par kaxyw na pre ã amnhĩ nhĩpêx anẽ. Satanasti kêp mẽ kot amnhĩ tomnuj xwỳnhjê hpãm nẽ kêp mẽ htyk xwỳnhjê hpãm.

¹⁵ Jakamã na hte kot mẽ pahtã ãhkra pikamỳr pyrãk o mẽ panhĩpêx pu mẽ ã hã pamã pahtyk puma nẽ ri papa. Tã ra Jejus kot mẽ pahwỳr wrỳk nẽ te kêp mẽ papytãr pyrãk o mẽ panhĩpêx jakamã pu mẽ tee ri pahtyk kukamã pajamaxpêr o ri pamã ma ho papa hkêt nẽ.

¹⁶ Nẽ Tĩrtũm kapêr o mẽ wrỳk xwỳnhjê ho mex kaxyw na pre Jejus pika hwỳr wrỳk kêt nẽ. Mẽ panhĩgêt finat Apraãw pyrã nẽ mẽ panhĩ ho panhĩ xwỳnhjê ho mex kaxyw na pre wrỳ.

¹⁷ Ijaew nhõ patrejaja na pre htem mẽ kot amnhĩ tomnuj mỳrapê mẽ hpãnhã Tĩrtũm mã mry hkwy pa nẽ hkamrô kapĩ nẽ mẽ ho Tĩrtũm wỳ. Kot hã mẽ omunh nẽ mẽ mex ã mẽ harênh kaxyw. Tã nhũm Jejus wrỳ nẽ mẽmo mryta pyrã nẽ ã mẽ panê hkamrô pikapĩr anẽ. Kaxyw na pre mẽ pahtõ maatija mẽ pahwỳr ã ho ã nẽ wrỳ nẽ mẽ pahpyrà nẽ ni nhõhy rũm kato. Jao kêp mẽ pahto Tĩrtũm wỳr xwỳnh maati. Na pre Tĩrtũm kãm hprãm xà hkôt mẽ panê mẽ pahte amnhĩ tomnuj pãnhã amnhĩrer

pa. Tã kot mẽ pahpyrà nẽ mẽmoj punuj pumunh nẽ amnhĩ xà htỳx kamã hamak o pa jakamã kệp mẽ pakamã ukapřĩ xwỳnh ã pixi mex na.

¹⁸ Kormã htyk kêt ri na pre mẽ pahpyrà nẽ omnuj nẽ ri pa. Nhũm mẽkarõmnuti nhõ pahi kot tanhmã amnhĩ tomnuj to hprãm xàj tee ri hkôt kãm ahkrox o pa hkapyrỳ nhũm hkôt amnhĩ nhĩpêx kêt nẽ amnhĩ nê ho axtem nẽ. Jakamã koja Satanastija uràk nẽ tanhmã mẽ panhĩpêx to nhũm Jejus mẽ pahtã omu nẽ amnhĩ pyrà nẽ tanhmã kệp mẽ panhĩpêx to pu mẽ ỹ hã kutã amnhĩ to htỳx nẽ papa.

3

Jejus kot amnhĩ to rax o Mojes jakrenh ã harênh Juãw 1.17-18

¹ E ixkrãmnhwỳjaja. Ra Tĩrtũm kot mẽ pahte kapêr mar nẽ tãm amnhĩ nhĩpêx o ri papa kaxyw mẽ pahto hkra jakamã kwa kêt ka mẽ Jejus kot tanhmã mẽ pamã amnhĩ nhĩpêx toja mã ajamaxpêr rãhã ho ri apa. Na pre Tĩrtũm mẽ pahwỳr kumẽ nhũm mẽ pahwỳr wrỳ nẽ Tĩrtũm kapêr o mẽ pajahkre ho ri mẽ pahkôt pa. Nẽ te kệp mẽ panhõ patre pyrà nẽ mẽ pahto Tĩrtũm wỳr o pa.

² Na pre Tĩrtũm finat Mojes kwỳ kaxyw Mojesja xãm nhũm kãm hprãm xà hkôt tanhmã mẽ hipêx to ho pa. Tã nhũm hpãnhã mẽ pakaxyw Kra Jejusja xãm nhũm Mojes pyrà nẽ Tĩrtũm kãm hprãm xà hkôt pix mã tanhmã mẽ panhĩpêx to ho pa. Hamẽ na pre wa Tĩrtũm jamaxpêr xà hkôt tanhmã kãm mẽ panhĩpêx to ho pa.

³ Koja mẽhõ amnhĩm ixkre mex nhĩpêx nẽ hipêx pa nhũm hkwỳjaja hwỳr mra nẽ omu nẽ mex

kumrêx ã harê. Nom kot hipêx xwÿnhnta àhpumunh xà hkôt hipêx jakamã tãm na mex o kot ixkreta jakrenh. Ja pyrà nê finat Mojes kot amnhĩ to rax tã nhũm Jejus kot amnhĩ to rax o kot hakrenh. Mojes te kêp ixkre nhĩpêxta pyràk no Jejus te kêp ixkre nhĩpêx xwÿnhnta pyràk jakamã kot amnhĩ to rax o kot Mojes jakrenh.

⁴ Nê mẽ kot ahpÿnhã amnhĩ krã hkôt tanhmã ixkre nhĩpêx to jakamã kot hipêx xwÿnhnta na mex o ixkreja jakrenh. Tã ja pyrà nê Tĩrtũm kot mẽmoj piitã ho kator jakamã kot amnhĩ to rax o kot mẽmoj piitã ho kator xwÿnh jakrenh par.

⁵ Nê finat Mojes na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nê ma kãm hkwÿjê piitã hkôt mẽ kãm kapêr jarênh o ri pa. Tĩrtũm tanhmã kot mẽ kãm kapêr tota kukamã nhũm mẽ kãm harênh o mẽ hkôt pa. No ãm Tĩrtũm mã tanhmã amnhĩ nhĩpêx to ho hpa xwÿnh pix na pre.

⁶ Nê Kris haxwÿja na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nom Mojes rom kêp Tĩrtũm Kra kumrêx jakamã kurom kêp mẽ panhõ Pahihti kumrêx. Tã kwa kêr pu mẽ kãm hprãm xà hkôt pix mã tanhmã kãm amnhĩ nhĩpêx to ho ri papa. Mẽ kot hã tanhmã mẽ panhĩpêx to htã pu mẽ ÿ hã mẽ kutã amnhĩ to htÿx nê papa nê pajamexpêr o:

—Nà ixpunuj nê ixpa htã kot paj ixpunuj rãhã ixpa ho ixpa hkêt nê. Kojã nhÿrmã Tĩrtũm ixto mex kumrêx pa axte tanhmã ixpunuj to nê ixpa hkêt nê. Hêxta waa nê. Nã ja inhmã hprãm tÿx kumrêx.

Anhÿr o amnhĩ kukamã pajamexpêr o papa.

*Mê pahte Tirtûm kaga hkêt ã mê pamã karõ
Wam Korît 10.1-11; Jutre 5*

7-8 Annepê m na pre mēhōja tanhmã Tirtûm Karõ nhỹ hã kapêr to nê kapêr o:

E kêr ka mê Tirtûm kapêr mar tỳx o apa.

No ama nê ãm ama nê ri hã apa hkêt nê. Rỳ kapêr pê akrã hihtỳx o apa hkêt nê.

Mê akukamã mê anhĩgêjtjaja na prem ã amnhĩ nhĩpêx anê nê Tirtûm kapêr pê hkrã hihtỳx o pa. Kapôt ã Mojes kôt mê pata ã na prem kãm Tirtûm kapêr mar prãm kêt nê. Nê tee ri amnhĩ kukamã hamaxpêr nê akupỹm Ejit wỳr hkrã nê axpên mã: “Kwa na pu mê ra pahpunuj tỳx nê papa nhũm Tirtûm ãm ja hã mê pahpumu nê tanhmã mê pahto mex to hkêt nê. Mãn ra mê pahkaga nà? E kwa pu mê awjanã nê ma akupỹm Ejit wỳr mãn papa.” Anê.

9-10 Na prem ã axpên mã kapêr anhỹr o ri pa hã amgrà pê 40.

Tirtûm xatã kot tanhmã mê ho mex to nhũm mê kot amnhĩ tâ omunh tâ ãm omu nê htỳx ri amnhĩ hkrã hkôt pa.

Nhũm tee ri amnhĩ tâ mê omu nê mê kamã gryk nê.

Hãmri nê hamaxpêr o: “Nà pêr mê hamaxpêr kot mê hã hkwỳ jêt kêt kumrêx. Te mê hamak kre hkêt pyrã nê ixkapêr mar kêt nê.” Anhỹr o hamaxpêr.

11 Hãmri nê mê kãm: “E mê inhma. ã mê ate amnhĩ nhĩpêx anhỹrja mỳrapê kot kaj mê ma ixte mê amã pika mex nhõr mã xwỳnhta wỳr apa hkêt nê.” Anhỹr o mê kãm kapêr. Anê.

Ã mēhōja Tirtūm Karō nhỹ hã te Tirtūm tãm kot mē kãm kapēr pyrāk o mē harēnh anē.

¹² Jakamã kwa mē okora ixkràmnhwỳjaja. Kêr ka mē amnhĩ to mex o apa. Tirtūm kêp Mēpahpãm ã pixi mex tã kot kaj mē tanhmã ajamaxpēr punuj to rỳ amnhĩ kaxyw hkôt ajamaxpēr kêt hãmri nē te ate amnhĩ katut kôt ãm pyrāk o hipêx nē hkaga. Kwa mē ã amnhĩ nhĩpêx anhỹr kêt nē.

¹³ Kêt mē Kris kôt axpēn to axihtỳx o ri apa. Nē apkati mē ã axpēn nhĩpêx anhỹr rãhã nē. Kot kaj mē anhỹr kêt hãmri nē mē amã Tirtūm kapēr mar prãm kêt ã amnhĩ to amnhĩrīt. Jao tanhmã amnhĩ tomnuj to ho ri apa nē atỳx ajamaxpēr o: —Nà ixte ã amnhĩ tomnuj anhỹr tã nhũm Tirtūm ja hã ixpumu nē ãm hã ixpumu.

Anhỹr o ajamaxpēr japêr. Rỳ mē ajamaxpēr o:

—Nà na pa hte ã amnhĩ tomnuj anē nhũm Tirtūm ja hã ixpumu nhũm ja kãm mex nē.

Anhỹr o ajamaxpēr japêr.

¹⁴ Kwa mē ri ã ajamaxpēr anhỹr kêt nē. Amnepê mã mē pahte Kris kôt amnhĩ xunhwỳr nhũm kot mē pahto hkrata ã na pu prem amnhĩ kaxyw hkôt pajamaxpēr o papa. Tã kêr pu mē arĩ ã amnhĩ nhĩpêx anhỹr tỳx o papa rãhã ty.

¹⁵ Tirtūm kapēr ã kagà htũm kot ja jarēnh kot: E kêr ka mē Tirtūm kapēr ma nē mar tỳx nē. No ama nē ãm mar nē ri hã apa hkêt nē. Rỳ mē kot hkaga xwỳnhjê pyrã nē kêp akrã hihtỳx kêt nē. Anē.

¹⁶ Mē panhīgêtjaja na prem Mojes kôt pika pê Ejit rũm kato nē hkĩnh nē ma kapôt ã kormã pika mex wỳr pa. Nom Tirtūm kapēr mar nē hkôt amnhĩ nhĩpêx rãhã hkêt nē. Na prem kuma nē hkôt

amnhĩ nhĩpêx o hã apkati grêre htã ra mẽmoj nhỹ hã omnuj nẽ pa hã amnhĩ pumu nẽ tee ri amnhĩ kukamã hamaxpêr.

¹⁷ Jao xatã kapêr nhĩrôp kuhê nẽ amnhĩ hkrã hkôt pix mã amnhĩ nhĩpêx o pa ho ra hã amgrà pê 40. Hãmri nhũm tee ri amnhĩ tã mẽ omu nhũm ja kêp omnuj nẽ. Jakamã nhũm mẽ piitã kapôt ã ri pa nẽ gaa nẽ pikaprâr pa.

¹⁸ Mẽ kot kapêr mar kêt jakamã nhũm mẽ kãm:

—Nà ã mẽ ate amnhĩ nhĩpêx anhỹr o ri apaja mýrapê kot kaj mẽ ixte mẽ amã mẽ amex nhôr mã xwýnhta wýr apa hkêt nẽ. Anẽ.

¹⁹ Tã mẽ kot amnhĩ kaxyw Tĩrtũm kôt hamaxpêr o pa hkêt jakamã na prem pika mexta wýr hpôx kêt rãhã pikaprâr pa. Nhũm mẽ hkra nẽ mẽ htãmnhwýjê pixjaja na prem mẽ mýr pê hwýr pøj nẽ kamã pa.

4

Mẽ pahte Tĩrtũm kukwak ri pajamakêtkati nẽ ri papa hã mẽ pajarênh

¹ Mẽ pahte Tĩrtũm kukwak ri pajamakêtkati nẽ ri papa ho papaja Tĩrtũm kãm hprãm jakamã kwa kêr pu mẽ amnhĩ pumunh mex o papa. Nẽ wam mẽ panhĩgêt rom Tĩrtũm kapêr mar tỳx nẽ hkôt mãn kêt ri amnhĩ nhĩpêx mex rãhã nẽ. Kêr pu mẽ kurom mẽ pajamak kãm amnhĩ krit xà hã pika mexta wýr pøj.

² Mẽ kot mẽ pahpyrà nẽ Tĩrtũm kapêr mar mex tã na htem amnhĩ kaxyw hkôt hamaxpêr kêt nẽ. Te mẽ kot mar kêt pyràk.

³ ãm mẽ kot amnhĩ kaxyw Kris mã hamaxpêr xwýnh pixjaja na htem kukwak ri hamakêtkati nẽ ri pa ho pa. Amnepê mã mẽmoj piitã hkêt ri na pre Tĩrtũm mẽmoj piitã ho kator pa hãmri nhũm apkati nhũm axte mẽmoj tã àpênh kêt nẽ. ãm õ krĩ kamã arĩ hamakêtkati nẽ hkôkôt o hkrĩ. Tã mẽ pahte urak nẽ pajamakêtkati nẽ papa ho papaja na kãm hprãm. No wam ri mẽ pa xwýnhjaja mẽ kot amnhĩ tomnuj mýrapê na pre Tĩrtũm mẽ kot ura nẽ hamakêtkati nẽ paja nẽ mẽ hkurê. Kapêr ã kagã htũm kot harênh kot:

Na pre Tĩrtũm tee ri amnhĩ tã mẽ kot hipêx ã mẽ omu nhũm ja kêp omnuj nẽ. Hãmri nhũm mẽ kãm: “Nà kot kaj mẽ ixkukwak ri axãmnhĩx ajamakêtkati nẽ apa hkêt nẽ.” Anẽ.

⁴ Nẽ kot harênh kot:

Na pre Tĩrtũm àpênh ã arĩgro kêp 6 hãmri nhũm arĩgro pê 7ta ã nhũm axte mẽmoj tã àpênh kêt nẽ. Na pre arĩ hkôkôt o nhỹ.

Arĩgro pê 7 ã arĩ hamakêtkati nẽ hkôkôt o nhỹ. Anẽ.

⁵ Nẽ mẽ kot kapêr mar nẽ ãm mar xwýnhjê jarênh kot:

Kot kaj mẽ aa ixkukwak ri axãmnhĩx nẽ ajamakêtkati nẽ apa hkêt nẽ. Anẽ.

⁶ Mẽ panhĩgêjtaja kot amnhĩ kaxyw Tĩrtũm kôt hamaxpêr kêt jakamã na prem hamakêtkati nẽ ri pa hkêt nẽ. Tã mẽ papajaja na Tĩrtũm arĩ kãm mẽ paxãmnhĩx nẽ pajamakêtkati nẽ papa hprãm.

⁷ Amnepêm Ijaew Tĩrtũm kôt hamaxpêr kêt jakamã na prem kapôt ã pikaprãr pa. Hãmri nhũm amgrã xohtô nẽ hapêx nhũm Tĩrtũm mẽ hkanrêhã mẽ htãmnhwýjê hõ pê finat Tawija mã kapêr nhũm

kuma nê mē pamã tanhmã kapêr tota ã kagà nê hã kagà kot:

Kwa kêr ka ixkapêr ma nê mar tỳx nê.

No mē anhîgêjtê pyrà nê akrã hihtỳx ho inhma nê ãm inhmar kêt nê. Anê.

Na pa pre ra mē amã ã ja jarênh anê.

⁸ Na pre finat Jojueja finat Mojes mỳr pê ma pika pê Kanaã hwỳr mē hkanrêhã mē hkrajê o pa nê hwỳr mē o pôj. Tã nhũm prem Jojue kukwak ri hamakêtkati nê pa ho pa hkêt nê. Kêp ãm kukwak ri ã amnhĩ nhĩpêx anhỳr ronhỳx Tĩrtũm axte mē kãm mē hamakêtkati nê mē hamakãm amnhĩ krit nê mē pata hkukamã harênh kêt nê.

⁹ Nom mē pahte kukwak ri pajamakêtkati nê pajamakãm amnhĩ krit nê ri papa ho papaja na Tĩrtũm arĩ kãm hprãm.

¹⁰ Na pre arĩgro pê 6ja ã mēmoj piitã ho kator pa nhũm apkati nhũm hamakêtkati nê hkôkôt o nhỹ. Tã kot puj mē pahpê hkrajaja amnhĩ to kuwỳ nhũm tanhmã mē pahkrã hto pu mē kukwak ri uràk nê paxàmnhĩx nê pajamakêtkati nê papa ho papa. Te Tĩrtũm àpênh pa nhũm apkati nhũm hamakêtkati nê hkôkôt o ỳrta pyràk.

¹¹ Jakamã kwa kêr pu mē amnhĩ to kuwỳ kê ã mē panhĩpêx anê pu mē uràk nê ã amnhĩ nhĩpêx anhỳr rãhã ho papa. Nom kot pu mē pahkwỳ Ijaewjê pyrà nê kapêr kwỳm amnhĩ nhĩpêx o papa hãmri nê mē urà nê paxàmnhĩx pajamakêtkati nê papa hkêt nê.

Tĩrtũm kapêr te kot wapo xwa gix pyràk ã harênh

¹² Nê Tĩrtũm kapêrja te ã ho tanhmã kot mēmoj to kaxyw hihtỳx pyràk. Nê te wapo xwa gix pyràk. Kojã mēhõ õ wapo xwa mex nê ho mēmoj jakàr

mex nê. Ho mry hi jakàr mex pê kaxwýnh kãm hi kanhñn o amnhĩrĩt. Ja pyrà nê na hte Tĩrtũm kapêr mẽ pajamexpêr o amnhĩrĩt nê mex ã harê rỳ omnuj ã harê.

¹³ Nê na htem Tĩrtũm pê mẽmoj to pimxur kêt nê. Na hte hprĩ hã mẽmoj piitã omunh pa. Nê mẽ pajamexpêr kôt mẽ pahpumunh pa. Na pu htem ã kot mẽmoj piitã omunh par anhỹr xwýnhja noo mã tanhmã amnhĩ nhĩpêx to rãhã ho papa.

*Jejus kêp mẽ panhõ patre maati hã harênh
Eprêw 10.19-25; Wam Juãw 2.1-2*

¹⁴ Nê Ijaew nhõ patrejaja na pre htem Tĩrtũm mã amnhĩ jarênh xà hã ixkre hwýr agjê nê kamã mẽ ho Tĩrtũm wýr o pa. Ja pyrà nê na pre ra Jejus Tĩrtũm nhõ krĩ hwýr api nê kamã mẽ pahto hwýr o hkrĩ. Kêp Kra kumrêx jakamã kêp mẽ pahto Tĩrtũm wýr xwýnh maati. Jakamã kwa kêr pu mẽ amnhĩ kaxyw hkôt pajamexpêr tỳx rãhã ho papa.

¹⁵ Satanasti na pre te kot mẽ panhĩpêx pyràk o Jejus nhĩpêx. Nê tee ri kot tanhmã kãm kapêr to nhũm kot mar nê tanhmã amnhĩ tomnuj to hprãm xàj ãm ri kãm ahkrox kaprỳ nhũm kutã amnhĩ to htỳx nê hkôt amnhĩ nhĩpêx kêt nê. Tã kot Satanasti kot amnhĩ nhĩpêx ã omunh mex jakamã na hte kêp mẽ pahpũmoxar mex o pa. Kot mẽ paxirerek kôt mẽ pahpumunh mex.

¹⁶ Jakamã kwa kêr pu mẽ amnhĩ tã kamã pahpi-jaàm kêt kãm paxãmnhĩx ri amnhĩ to hwýr o papa. Kêp mẽ pakutã nojarêt xwýnh nê kêp mẽ pakamã ukaprĩ xwýnh jakamã kêr pu mẽ tee ri mẽmoj tã amnhĩ pumu nê amnhĩ to hwýr kurê kumrêx.

Hãmri nê ÿ hã paxàmnhĩx nê pajamakêtkati nê ri papa.

5

¹ Nê mẽ panhõ patre maati Jejusja Tĩrtũm na pre mẽ pakaxyw ãm. Kêp mẽ pahkwỳ hã mẽ pakaxyw ãm nhũm hte mẽ pahto Tĩrtũm wỳr o pa. Nê kãm mẽ pahkĩnh xà nhõr o pa. Kot ja hã mẽ pahpumunh nê mẽ pahte kapêr kwỳm tanhmã amnhĩ nhĩpêx to ho papa hã mẽ pakamã gryk o hapêx tokyx anhỳr kaxyw.

² Mẽ panhĩgêjtjaja na pre htem mẽ õ patre maati hwỳr mra nê kãm tanhmã amnhĩ tomnuj to hã amnhĩ jarẽ nhũm mẽ kuma nê mẽ kamã ukapĩ nê. Mẽ urà nê kormã kot Tĩrtũm kôt amnhĩ nhĩpêx totuj anhỳr jakamã na pre mẽ kot tanhmã amnhĩ jarẽnh toja ma nê mẽ kamã ukapĩ nê.

³ Hãmri nê mẽ hpãnhã Tĩrtũm mã mẽmoj gõ nê mããnẽn amnhĩ pãnhã kãm mẽmoj gõ. Mẽ urak nê kot amnhĩ tomnuj o paja mỳrapê amnhĩ pãnhã kãm mẽmoj gõ.

⁴ No na pre hte patrejaja amnhĩ krã hkôt kêp patre maati kaxyw amnhĩ xunhwỳr kêt nê. Tĩrtũm kot mẽ kaxyw mẽ unhwỳr jakamã na pre mẽ kaxyw finat Arãwja xãm nhũm kêp mẽ õ patre maati hã mẽ ho Tĩrtũm wỳr o pa.

⁵ Nê Kris haxwỳja kêp mẽ panhõ pahi maati hã tãm kot amnhĩ xãm kêt. Tĩrtũm na pre mẽ pakaxyw ãm nê tanhmã kãm kapêr to nê kãm:

Nà apê Ixkra na ka.

Kot paj jarãhã ixpê Anhĩpêêxà hã mẽ kãm amnhĩ jarẽ. Anẽ.

⁶ Nê hpãnhã kãm:

Kot kaj Mekijetek pyrà nê apê patre maati hã mē ho ixwÿr rãhã ho ri apa. Anê.

⁷ Jejus kormã pika ja kamã pa ri na pre amnhĩ to Tĩrtũm wÿr rãhã ho pa. Tõhã hkaprĩ nê tee ri mēmoj tã amnhĩ pumu nê amnhĩ to kuwÿ. Nê tee ri mē kot hpĩrta kukamã hamaxpêr nê mÿr kãm amnhĩ to kuwÿ. Kop apu Tĩrtũm kãm mē kot kêp hpĩr prãm kêt ronhÿx pre tanhmã nê mē kãm hkurê xwÿnhjê ho nhũm mē hpĩr kêt nê. Jakamã nhũm pre ã amnhĩ to hwÿr anê. No ãm Tĩrtũm kãm prãm xà hkôt kãm amnhĩ nhĩpêx prãm jakamã nhũm kuma no ãm tanhmã nê mē ho hkêt nhũm prem kupĩ.

⁸ Kêp Tĩrtũm Kra kumrêx tã amnhĩ xà htÿx kãm hamak kãm ty. Jao Tĩrtũm kãm hprãm xà hkôt amnhĩ nhĩpêx ã amnhĩ pumunh mex nê.

⁹ Na pre amnhĩ xà htÿx kãm hamak o amnhĩ mex o amnhĩ mex ã mē kãm amnhĩ to amnhĩrĩt. Jakamã na hte mē kot kapêr kôt ri amnhĩ nhĩpêx o mē pa xwÿnhjê mã mē kot amnhĩ nhĩpêx nyw jagjê nê nhÿrmã Tĩrtũm mē wa kuri mē htĩr tũm nê mē pa mã xwÿnhjê hã mē harê.

¹⁰ Jakamã na pre Tĩrtũm Mekijetek pyrà nê kêp patre maati kaxyw ãm.

Mê pahte Kris kaga nê mē pahkurê

Wam Korĩt 3.1-2, 13.11, 14.20; Epes 4.11-16

¹¹ Nê Jejus kêp mē pahto Tĩrtũm wÿr xwÿnh maati hã harênhja inhmã ixprĩ hã mē amã harênh par prãm tã ka mē kormã inhmar tÿx kêt nê. Pa tee ri ixprĩ hã mē amã harênh kaprÿ. Te mē amã mar prãm kêt o amõr pyræk.

¹² Amnepê mã mē ate Kris kôt amnhĩ xunhwÿr nê kapêr mar tÿx tã kormã nhãm amnhĩ xô ri ho

amnhĩ kwỳjê jahkre ho ri apa hkêt nê. Te mē ate hã ano hkêt pyrāk jakamã na pa hte arĩ mē amã kapēr kot amnhĩrīt mex xwỳnh kwỳ ho mē ajahkre ho pa. No kot amnhĩrīt mex kêt xwỳnh o mē ajahkre hkêt nê. Te mē hkaràre kot amnhĩ nhĩpêx pyrāk o na ka htem amnhĩ nhĩpêx o apa. Na hte mē hkaràre mēo mex kur kêt nê. ãm kormã katorxà hkà pix kaô. Ja pyrà nê ãm Tĩrtũm kapēr kot amnhĩrīt mex xwỳnhhta pix na ka mē mar tỳx o apa nom kapēr kot amnhĩrīt mex kêt xwỳnhja ka mē mar mex kêt nê.

13 Nê mē hkaràre kormã Tĩrtũm kapēr mar kêt jakamã na htem kormã mēmoj mex nê mēmoj punuj pumunh kêt nê. Tã te mē ate mē kot amnhĩ nhĩpêx pyrāk.

14 Mē kot Tĩrtũm kapēr mar mex xwỳnhjaja na htem hprĩ hã kapēr piitã mar tỳx nê. Kot amnhĩrīt mex xwỳnhhta mar tỳx nê mãnên kot amnhĩrīt mex kêt xwỳnhja nhũm mēhprĩ hã piitã mar tỳx nê. Te ho mē àptàr kot mēo mex kur o pata pyrāk. Jao ra mē àptàr jamaxpēr o hamaxpēr o ri pa nê hamaxpēr o:

—Kot paj tãm amnhĩ nhĩpêx o ri ixpa nhũm ja inhmã mex nê. Nom kot paj axtem tanhmã amnhĩ tomnuj to nhũm ja ixpê omnuj nê. Jakamã kot paj tãm amnhĩ nhĩpêx pix o ri ixpa nhũm Tĩrtũm mã ja mex nê. Anê.

6

1-2 Na pu prem ra Tĩrtũm kapēr kot amnhĩrīt mex xwỳnhhta kwỳ ma. Tãm na ja:

Kris kot mē panê tanhmã amnhĩ nhĩpêx to hã harēnhja.

Ně mẽ pahte amnhĩ tomnuj kaga hã kot mẽ pamã karõja.

Ně amnhĩ kaxyw Tĩrtũm kõt mẽ pajamaxpěr ã mẽ pamã karõja.

Ně mẽ pahpê Tĩrtũm kra hã amnhĩ to amnhĩrĩt kaxyw mẽ kot mẽ pahkrã kumrãr ã pamã karõja.

Ně mẽ pahte Tĩrtũm mã tanhmã amnhĩ nhĩpêx to ho papa hkukamã mẽ kot mẽ pahkrã hã ĩhkra jaxwýr ně mẽ pahto Tĩrtũm wýr ã mẽ pamã karõja.

Ně mẽ pahtyk ně akupým mẽ pahtĩr ã mẽ pajarēnhja.

Ně Tĩrtũm kot nhỹrmã mẽ kot amnhĩ xà htýx kãm hamak tũm xà hwýr mẽ kêp hkra hkêt xwýnhjê janorja.

Měmojjã piitã pu mẽ ra harēnh mar týx ně. Prĩ hã kot amnhĩrĩt mex. Tã kwa kêr pu mẽ hpãnhã hijuk ri kot amnhĩrĩt mex kêt xwýnh kwý ma. Jao mẽ pahpê Tĩrtũm kra xãptãr mex ně ri papa.

³ Jakamã kwa kêr pu mẽ kot amnhĩrĩt mex xwýnh kumrêx kwý ma ně hpãnhã hijuk ri kot amnhĩrĩt mex kêt xwýnh kwý ma. Ně axpẽn mã harēnh rãhã ho ri papa. Nà koja Tĩrtũm kãm ja prãm pu mẽ ã amnhĩ nhĩpêx anhýr rãhã o ri papa.

⁴⁻⁶ Na pre ra mẽ pahkwýjjaja Kris kaga ně htýx ri amnhĩ nhĩpêx o pa. Mě kot kapěr mar týx tã axtem ně hkaga jakamã koja mẽ axte kapěr mar kêt ně. Ra mẽ kãm mar prãm kêt. Kot puj mẽ tee ri axte mẽ kãm harēnh o papa kaprý. Na prem hprĩ hã kuma. Tĩrtũm kãm mẽ ho hkra hprãm ã harēnhja nhũm prem hprĩ hã kuma ně kãm mar prãm ně hkõt amnhĩ xunhwý. Hãmri nhũm Tĩrtũm Karõ te

mê panhîpêx pyrâ nê mê hkarô mã agjê nê mê kot amnhî to mex o pa kaxyw tanhmã mê hkrã hto nhũm prem ÿ hã tanhmã kãm amnhî nhîpêx to ho pa. Nê kãm Tîrtũm kapêr mar prãm nê. Nê axpên mã mex o mex ã harênh o pa. Nê aa mê kot mẽmoj pumunh kêt kwỳ pumu nê axpên mã harênh o:

—Nà Krisja ãm hãmri àhpumunh tỳx o àhpumunh tỳx. Koja nhỹrmã akupỹn mê pahwỳr wrỳ nê axte mẽ pamã àhpumunh tỳx o amnhîrît pu mẽ omu.

Anhỹr o kapêr tã tanhmã hamaxpêr to nê hkaga. Jakamã te mẽ kot axte Tîrtũm pê Krata pĩ hã nhôr nê hpĩr pyrâk. Nê te mẽ piitã mẽ noo mã tanhmã haprỳ hto nê tanhmã kãm kapêr punuj to pyrâk. Jakamã kot pu mẽ tee ri akupỹm tãm mẽ unhwỳr prãm kaprỳ.

⁷ Na hte Tîrtũm mẽ pahto mex rãhã ho pa. Jao mẽ pamã mẽ pahpur ã na rê pu mẽ kamã panhõ rũnh nê. Jakamã mẽ kot amnhî kaxyw Kris kôt hamaxpêr nê hkôt amnhî xunhwỳr prãm xwỳnhjaja te mẽ hpur mex nê kamã mẽmoj ô rũnh pyrâk. Nê urâk nê amnhî to mex o pa.

⁸ Nom koja mẽ hpur kãm mẽmoj nhĩgrôt mex kêt japêr. Kamã mrônhî nê kahpare nê mẽmoj punuj pix hapôj nhũm mẽ tee ri omu nê hkaga kurê kumrêx. Tã mẽ kot Kris kaga xwỳnhjaja te pur punuj kot amnhî nhîpêxta pyrâk nhũm Tîrtũm te kêp pur nhõ dôn pyrâk. Jao tee ri amnhî tã mẽ kot amnhî nhîpêx ã mẽ omu nê mẽ hkaga kurê kumrêx nê ma mẽ kot amnhî xà htỳx kãm hamak tũm xà pê kuwytã wỳr mẽ rênh pa.

⁹ E ixkràmnhwỳjaja. Inhmã mẽ akĩnh jakamã na pa ã mẽ amã mẽ kot Kris kaga xwỳnhjê jarênh anê. Nom te mẽ ate mẽ urâk kêt. Kris kôt mẽ ate amnhî

xunhwÿr xwÿnh mex na ka mẽ. Ra mẽ ate hkôt amnhĩ xunhwÿr tÿx jakamã te mẽ apê pur mexta pyræk.

¹⁰ Na ka htem Kris kôt mẽ akwÿjê ho mex o ri apa. Te mẽ amã amnhĩ tã ma pyræk o axpên nhĩpêx o ri apa nhũm Tĩrtũm ja hã mẽ apumu. Tã koja tanhmã ja hã mẽ ato mex to. Kot tãm mẽ panhĩpêx o pa jakamã koja tanhmã mẽ ate axpên nhĩpêx mex tota ã tanhmã mẽ ato mex to.

¹¹ Tã kêr ka mẽ arĩ ã axpên nhĩpêx anhÿr o ri apa rãhã ty kê nhÿrmã ja hã mẽ ato mex nê. ã mẽ ate amnhĩ nhĩpêx anhÿr o apaja na inhmã hprãm tÿx kumrêx.

¹² Kot kaj mẽ ã amnhĩ nhĩpêx anê hãmri nê amã kaga nê apa hkêt nê. Nê amnhĩ nhĩpêx o te Tĩrtũm kra hkwÿ htyk xwÿnhjaja kormã htĩr ri kot amnhĩ nhĩpêxta pyræk. Na prem amnhĩ kaxyw Tĩrtũm mã hamaxpêr tÿx rãhã ho pa. Kot mẽ ho mex ã mẽ hã amnhĩ jarênhja nhũm prem amnhĩ tã kamã hamak rãhã ho pa. Tã amnhĩ tã kamã hamak o pa ry rax rãhã ty nhũm Tĩrtũm ra kot mẽ hã amnhĩ jarênh xà hkôt mẽ ho mex nê. Tã kêr ka mẽ uræk nê ã amnhĩ nhĩpêx anhÿr o ri apa rãhã ty.

¹³⁻¹⁵ ã na pre finat Apraãwja amnhĩ nhĩpêx anê. Kormã hkra hkêt tã nhũm Tĩrtũm kãm hkra nê kanrêhã htãmnhwÿjê hkukamã tanhmã mẽ harênh to nê kãm:

—Pa Apraãw. E inhma. Kot paj aprõ mẽ war ato mex nê. Kot kaj war akra hãmri nê gaa nhũm akanrêhã war atãmnhwÿjaja ohtô rax kumrêx. ãm hãmri na pa ã mẽ hkukamã amã mẽ harênh anê. Kot paj amã amnhĩ jarênh xà hkôt ã anhĩpêx anê. Ixpê mẽ anhĩpêx xwÿnh na pa ã amã amnhĩ jarênh

anê. Anê.

Tã ã kãm wa hkra jarênh anhÿr tã nhũm wa tokyx hkra hkêt nê. Nom tee ri ja hã amnhĩ pumu nê Tĩrtũm kot wa kãm hêx ã hkamnhĩx kêt nê. Æm hkamnâr rom ã hamaxpêr anê nê hamaxpêr o:

—Nà kot paj wa nhÿrmã ixkra. Tĩrtũm tãm kot wa inhmã wa ixkra jarênh kênã. Anê.

Tã nhũm amgrà xohtô rax kumrêx nê hapêx nhũm wa hkra. Nhũm axte amgrà hkwy hapêx nhũm wa hkanrêhã htãmnhwÿ hkwy. Ra Tĩrtũm kot mē hkukamã Apraãw mã mē harênh xà hkôt. Tĩrtũmja hihtÿx o hihtÿx nê àhpumunh o àhpumunh jakamã na pre amnhĩ jarênh xà hkôt ã wa kãm wa hkra nê wa htãmnhwÿjê nhõr anê. Kot ra wa kãm hã amnhĩ jarênh xà hkôt. No ri nhãm mēhõ nhĩxi jarênh kôt wa kãm wa hkra jarênh kêt nê. Mēhõ kot we hihtÿx o hihtÿx o Tĩrtũm jakre nhũm we ri hixi jarênh kôt ã wa kãm mē harênh anê? Amrakati kumrêx. Jakamã na pre wa kãm amnhĩ jarênh o:

—Nà ixàhpumunh xà hkôt na pa ã war amã war akra jarênh anê. Anê.

¹⁶ No pika ja kamã na htem ã amnhĩ jarênh anhÿr kêt nê. Na htem mēhõ mã tanhmã mēmoj tã amnhĩ jarênh to kaxyw nê mēhõ hihtÿx o kot hakrenh xwÿnh nhĩxi jarênh kôt amnhĩ jarê. Nê amnhĩ jarênh o:

—Nà ixte jahti noo mã ã amã amnhĩ jarênh anhÿr jakamã ãm hãmri na pa ã amnhĩ jarênh anê. Anê.

Kot hã amnhĩ to hêx nhũm hihtÿx o kot hakrenh xwÿnhhta kot hã harênh mar nê hã tanhmã homnuj to pymaj na htem ã mē hixi jarênh kôt mēmoj tã amnhĩ jarênh anê. Hãmri nê kot tanhmã hã ho

pymaj ra kot amnhĩ jarēnh xà hkôt tanhmã mẽmoj nhĩpêx to.

¹⁷ Nom Tĩrtũm na hte uràk nē nhãm mēhō nhĩxi jarēnh kôt ri mẽmoj tã amnhĩ jarēnh kêt nē. Na hte tãm amnhĩ jarēnh xà hkôt mẽmoj to anē nē aa hã amnhĩ to hêx kêt nē. Na pre mẽ pahpê hkrajê mã kãm:

—Kot paj nhỹrmã mẽ ato mex rax nē. ãm hãmri na pa mẽ amã amnhĩ jarē. Ixte amnhĩ pumunh xà hkôt na pa ã mẽ amã amnhĩ jarēnh anē. Anē.

Mẽ pahte ãm hãmri kot amnhĩ jarēnhja mar nē amnhĩ to hêx kêt ã omunh kurê kumrêx kaxyw. Koja Tĩrtũm mẽmoj tã ã amnhĩ jarēnh anē hãmri nē hijuk ri axtem hpãnhã tanhmã amnhĩ jarēnh to hkêt nē.

¹⁸ Jakamã koja nhỹrmã ma amnhĩ wỳr mẽ pahto àpir ã amnhĩ jarē hãmri nē ãm hãmri amnhĩ jarē nē amnhĩ jarēnh o:

—Nà ãm hãmri ixte amnhĩ pumunh xà hkôt na pa mẽ amã ja hã amnhĩ jarē. Anē.

Koja ã amnhĩ jarēnh anē hãmri nē hijuk ri axte hpãnhã tanhmã mẽmoj jarēnh to hkêt nē. Ra kot ã amnhĩ jarēnh anhỹrja koja arĩ rãhã nē. Jakamã e kwa kêr ka mẽ tee ri amnhĩ kukamã ajamaxpêr o ri apa hkêt nē. Ra mẽ pamex nē ri papa kaxyw Tĩrtũm kôt amnhĩ xunhwỳr jakamã kêr pu mẽ arĩ kot mẽ pahto mex rax xà hã arĩgrota jamãr rãhã ho ri papa.

¹⁹ Na hte kanôre ho htỳx xàja kanôre ho htỳx nhũm ma gô hkôt pa hkêt nē. Ja pyrà nē kot puj mẽ Tĩrtũm kot mẽ pahto mex xà kamã pajamak o papa hãmri nē hkaga hkêt nē.

Amnepê mã na pre hte mẽ panhõ patre maati ja Tĩrtũm mã amnhĩ jarẽnh xà hã ixkre hwỳr agjê nẽ hkõt ã kupẽxê ho hitom maati hwỳr agjê nẽ kamã mẽ ho Tĩrtũm wỳr o kuhê. Tã nhũm Jejus akupỳm kaxkwa hwỳr api nẽ Tĩrtũm ri hkrĩ hãmri nẽ patre maatita pãnhã tãm mẽ pahto hwỳr o hkrĩ.

²⁰ Na pre ra mẽ pakukamã kaxkwa hwỳr api nẽ kamã pa ho pa nẽ finat Mekijetekja pyrã nẽ kêp mẽ panhõ patre maati. Tã koja mẽ pahto Tĩrtũm wỳr rãhã nẽ pa ho pa.

7

Patre Mekijetek jarẽnh

¹⁻³ E kot paj ixprĩ hã mẽ amã tanhmã finat Mekijetekja jarẽnh to ka mẽ inhma. Krĩ pê Sarẽ kamã na pre kêp mẽ õ pahi nẽ mããnẽn kêp mẽõ patre. Sarẽja mẽ pakapêr kãm kêp: “Mẽ hamakêtkati nẽ ri mẽ pa xwỳnhjê nhõ krĩ.” Jakamã Mekijetekja mẽ pakapêr kãm kêp: “Mẽ hamakêtkati nẽ ri mẽ pa xwỳnhjê nhõ pahi.” Nẽ mããnẽn kêp: “Pahi kot tãm amnhĩ nhĩpêx o pa xwỳnh.” Nẽ Mekijetek nhĩpêxà nẽ katorxà nẽ higêt nhĩxija mẽ pahte harẽnh mar kêt. Nẽ kator ã arĩgro nẽ htyk ã arĩgroja mããnẽn mẽ pahte harẽnh mar kêt. Tĩrtũm kapêr ã kagã htũm kot tanhmã ja jarẽnh to hkêt. ãm Jejus pyrã nẽ kêp patre hã mẽ ho Tĩrtũm wỳr rãhã ho pa xwỳnh pix ã kot harẽnh. ãm ja pix na mẽ pahte harẽnh mar. Nẽ kot amnhĩ to rax xwỳnh jakamã na pre Apraãw nhỹri omu nẽ hã hpijaãm kaxyw kãm hikukrêx kwỳgõ. Na pre hkwỳjê mẽ ra mẽ urojê kutã amnhĩ xunhwỳ nẽ pijapu nẽ mẽ kêp mẽ õ pahi ho 4 nẽ mẽ himex. Nẽ mẽ kêp mẽ hikukrêx kwỳptã nẽ hamỳ

nê ma ò krĩ hwỳr o mō. Nê kormã pry hã mōr ri Mekijetek kaxpa nhũm amnhĩ wỳr omu nê kãm:

—Pa Apraãw? E kê Tĩrtũm ato mex nê ka amex nê apa. Anê.

Nhũm amnhĩ tã kuma nê hkĩnh nê. Hãmri nê kãm mẽ hikukrêx kwỳptàr xwỳnhta hkwy gō nhũm hamỳ nê ma amnhĩm o mō.

⁴ Na pre Apraãw kot amnhĩ to rax ã omu nê kãm mẽmojta kwỳ gō. Kêp mẽ pahpê Ijaew pàr krax jakamã mãânên kot amnhĩ to rax tã Mekijetekja uràk nê kot amnhĩ to rax ã omu nê kãm mẽmota kwỳ gō.

⁵ Finat Mojes kot Ijaew mã Tĩrtũm kapêr jarênh xà hkôt kãm kugō. Na pre mẽ kãm:

—Mê akwỳ pê finat Rewi hkanrêhã htàmnhwỳjaja kêp mẽ anhō patre jakamã kêr ka mẽ kãm mẽ akukrêx kwỳ nhōr o ri apa. Kot kaj mẽ akrit kêp 10 nê kãm ho pixi nê agō. Nê mẽ akàxpore kêp 10 nê kãm hō gō. Kêr ka mẽ ã mẽ kãm mẽ akukrêx nê mẽ akrit kwỳ nhōr o apa anê. Nê kêr ka mẽ kãm mẽmoj mex pix gō. Mẽ kêp mẽ akwỳ na mẽ. Mẽ apiitã mẽ apê Apraãw kanrêhã htàmnhwỳ jakamã kêr ka mẽ ã mẽ hipêx anhỳr o apa. Anê.

⁶ Tã Mekijetekja kêp Rewi hkwy hkêt tã nhũm Apraãw amarĩ ã hipêx anê nê kãm pahi htyk xwỳnhjê kukrêxta kwỳ gō. Jao hikukrêxta kamã mẽmoj kêp 10 nhũm omu nê kamã kãm ho hpỳnh nê kugō. Na pre ã kãm mẽmoj nhōr anê. Hãmri nhũm amnhĩm hamỳ nê kãm:

—Nà ãm hãmri koja Tĩrtũm ato mex rax nê. Anê.

Ra Tĩrtũm kot Apraãw kanrêhã kãm htàmnhwỳ ho ohtô nê mẽ hkukamã mẽ harênh jakamã nhũm Mekijetekja ã kãm Tĩrtũm kot ho mex ã harênh anê.

7 Mē kot amnhĩ to rūnh o mē hakrenh xwỳnh pixjaja Tĩrtũm kot mē ho mex kaxyw mē ho àhwỳr o pa jakamã na pre Apraãw o Tĩrtũm wỳ. Jao kot amnhĩ to rax o kot hakrenh ã amnhĩ to amnhĩrĩt.

8 Hãmri nē Rewi hkanrêhã htàmnhwỳ kot amnhĩ nhĩpêx pyrã nē Apraãw o Tĩrtũm wỳ nē kêp mēmojta jamỳ. Mē uràk nē mēmoj kamã kêp 10ja rũm ho hpỳnh nē amnhĩm hamỳ. Nom kot amnhĩ to rax o Rewi hkanrêhã htàmnhwỳjê jakrenh. Tĩrtũm kapêr ã kagà htũm kot Rewi hkanrêhã htàmnhwỳjê htyk par ã mē harênh tã tanhmã Mekijetek htyk ã harênh to hkêt jakamã kot amnhĩ to rax o kot Rewi hkwỳjê jakrenh.

9-10 Nē kot pry kamã Apraãw kaxparta ã kormã Rewi kator kêt tã kêp Apraãw kanrêhã htàmnhwỳ mã xwỳnh. Jakamã nhũm Apraãwja Mekijetek mã mē hikukrêxta kwỳ nhõr jao te Rewi mã õr pyrãk. Tã nhũm amgrà xohtô nē hapêx nhũm Rewi hkanrêhã htàmnhwỳjaja hapôj nē kêp mē õ patre nē ri pa. Jao Mekijetek pyrã nē mē kêp mē hikukrêx kwỳ jamỳnh o ri pa.

11 Nē finat Mojes na pre Ijaewjê mã tanhmã Rewi hkanrêhã htàmnhwỳjê jarênh to. Kormã mē hapôx kêt ri nhũm hkwỳjê mã tanhmã mē harênh to. Mē kêp patre hã mē harê. Tã nhũm mē hapôj nē hprêk nē mē ho Tĩrtũm wỳr o ri mē hkôt pa. Nom mē kot tãm amnhĩ nhĩpêx o pa kaxyw na prem tanhmã mē hkrã hto hkêt nē. Tanhmã kot mē amnhĩ to nē ã mē hipêx anê? Jakamã nhũm Tĩrtũm mē hpãnhã mē pahwỳr kỳj rũm mēhõja mē nhũm mē pahwỳr wrỳ. Nom kêp Rewi hkanrêhã htàmnhwỳ hkêt. Nē mããnên kêp Rewi hpãm Arãw kanrêhã htàmnhwỳ hkêt. Axtem te Mekijetek kot

amnhĩ nhĩpêx pyràk xwýnh na pre. Jejus Krisja. Tãm na pre mẽ pahwýr wrý hãmri nẽ tanhmã mẽ pahkrã hto pu mẽ ý hã tãm amnhĩ nhĩpêx o papa.

¹² No Mojes kapêr kot Rewi hkanrêhã htàmnhwý pixjaja kêp mẽ ho Tĩrtũm wýr xwýnh ã mẽ harênh. Tã nhũm Krisja mẽ pahwýr wrý nẽ mẽ hpãnhã kêp mẽ pahto àhwýr o pa xwýnh. Jakamã na pu htem axte Mojes kapêr kôt amnhĩ nhĩpêx kêt nẽ. Pãnhã Jejus kapêr kôt pix mã amnhĩ nhĩpêx o papa.

¹³⁻¹⁴ Nẽ Jejus kêp Rewi hkanrêhã htàmnhwý hkêt. Katorxà hkôt kêp Apraãw tàmnhwý Juta hkanrêhã htàmnhwý na pre. Ra mẽ pahte ja mar mex. Aa Juta hkanrêhã htàmnhwýjaja kêp patre hkêt. Na pre Tĩrtũm jajê mã mẽ kot mẽmoj nhõr xà hã mêsti kunĩhtita ã kãm mẽmoj nhõr nẽ hkwyjê ho hwýr ã mẽ kãm karõ hkêt nẽ. ãm Apraãw tàmnhwý Rewi hkanrêhã htàmnhwýjê mã pix mã na pre ã mẽ kãm ja hã karõ anẽ. Tã nhũm Jejus wrý nẽ mẽ hpãnhã mẽ pahto hwýr o pa. Mẽ uràk nẽ kêp Rewi hkanrêhã htàmnhwý hkêt axtem kêp Juta hkanrêhã htàmnhwý htã Rewi hkwyjê hpãnhã mẽ pahto Tĩrtũm wýr o pa.

Mekijetek pyrà nẽ mẽ pahto Tĩrtũm wýr xwýnh jarênh

¹⁵⁻¹⁹ Nẽ Ijaewja na prem Mojes kapêr mar tỳx nẽ hkôt amnhĩ nhĩpêx tã aa amnhĩ to mex kêt nhũm Tĩrtũm tee ri ja hã mẽ omu nẽ hamaxpêr o:

—Nà Rewi hkanrêhã htàmnhwýjaja kêp mẽ õ pa-tre nẽ mẽ ho ixwýr o pa htã nhũm mẽ arĩ htỳx ri amnhĩ tomnuj pix o pa. Jakamã koja mẽ axte ri mẽ ho ixwýr o pa hkêt nẽ. Anẽ.

Hāmri nē mē pakaxyw mē pahto àhwÿr xwÿnhja ta nē ãm. Kra Jejusja nhũm kuta nē ãm. Tãm na hte Rewi hkwÿjê rom tanhmã mē pahkrã hto pu mē kukwak ri tãm amnhĩ nhĩpêx nē Tĩrtũm kôt amnhĩ nhĩpêx mex nē. Jao nhÿrmã ma mē pahte Tĩrtũm nhõ krĩ hwÿr paxàpirja jamãr o papa.

Jejus na hte Mekijetek pyrã nē kêp mē panhõ patre maati nē mē pahto Tĩrtũm wÿr rãhã ho pa. Kêp Rewi hkanrêhã htãmnhwÿ hkêt tã Tĩrtũm pyrã nē kêp htĩr tũm nē pa ho pa xwÿnh jakamã na pre Tĩrtũmja mē pakaxyw kuta nē mē pahwÿr kumê. Kapêr ã kagã htũm kot harênh kot:

Kot kaj Mekijetek pyrã nē mē ho ixwÿr rãhã ho ri apa. Anê.

²⁰⁻²¹ No Rewi hkwÿjê mã na pre ã kapêr anhÿr kêt nē. ãm Jejus pix mã ã kapêr anê nē kãm:

E kot kaj apê mē ho ixwÿr rãhã o apa xwÿnh. Kot paj nhÿrmã apãnhã axtem mēhõ xãm kêt nē.

ãm kapxipix kot kaj mē ho ixwÿr o apa rãhã ho rãhã. ãm hãmri na pa amã ã ixkapêr anê. Ixpê Pahi Maati hã ã ajarênh anê.

²² Anhÿr jao Jejus kot amnhĩ to rax o Rewi hkwÿjê jakrenh par ã ho amnhĩrĩt. Mē kot Ijaew mã Tĩrtũm kapêr jarênh nhũm mē kot mar nom hkôt amnhĩ nhĩpêx kêt jakamã nhũm Tĩrtũm mē hpãnhã Jejus xãm. Tapxipix na hte tanhmã mē pahkrã hto pu mē tãm amnhĩ nhĩpêx mex o ri papa.

²³ Rewi hkwÿjaja na prem axpên mÿr pê kêp mēõ patre nē ri pa htã htyk pa nē hapêx.

²⁴ Nom Jejusja htĩr tũm nē pa ho pa xwÿnh jakamã koja mē urak nē aa hapêx kêt. Koja mē pahto Tĩrtũm wÿr rãhã ho pa nē aa jam urer kêt nē.

25 ã Jejus kot amnhĩ nhĩpêx anhÿr jakamã te kêp Tĩrtũm wÿr mẽ panhõ pry pyræk. Na pu htem hkôt amnhĩ xunhwÿ nhũm mẽ panê mẽ pahte amnhĩ tomnuj piitã rênh pa nê mẽ pahpê Tĩrtũm kra hã mẽ pajarê.

26 Nê ãm hãmri kêp mẽ pahto Tĩrtũm wÿr xwÿnh maati mex na. Mẽ pakurom tãm kot amnhĩ nhĩpêx mex o pa nê aa kot tanhmã amnhĩ tomnuj to hkêt. Tã ra Tĩrtũm kot amnhĩ wÿr ho àpir jakamã nhũm ra kuri mẽ pahto hwÿr rãhã ho pa.

27 Nê kot amnhĩ to rax o wam mẽõ patre maati jê jakrenh. Wamtaja na prem hkwÿjê pyrã nê amnhĩ tomnuj o pa. Jakamã na prem apkati mẽ amnhĩ tomnuj pãnhã Tĩrtũm mã mẽmoj gõ nê kãm amnhĩ jarê nê amnhĩ to kuwÿ. Hãmri nê rĩ kormã kot nhãm mẽ hwÿr mẽ mrar xwÿnhjê mã mẽ ho anê nê mẽ hpãnhã Tĩrtũm mã mẽmoj nhõr pê mẽ ho kuwÿ. No kêt Jejusja wam patre maati rom aa kot amnhĩ tomnuj kêt jakamã na pre hte mẽ uræk nê amnhĩ tomnuj pãnhã Tĩrtũm mã mẽmoj nhõr o pa hkêt nê. ãm mẽ papajaja na pre mẽ pahte amnhĩ tomnuj pãnhã htyk o kãm amnhĩre. ãm htyk tipxi htã mẽ pahpiitã mẽ pahpãnhã amnhĩrer pa. Jakamã koja axte ã amnhĩ nhĩpêx anhÿr kêt nê. Mo kaxyw kot kêt axte mẽ panê ty?

28 Mojes kapêr kôt na pre Ijaew amnhĩm Rewi hkwÿjê xunhwÿ nhũm mẽ kêp mẽ õ patre nê ri pa. Tã no nhũm mẽ uræk nê arĩ amnhĩ tomnuj o pa nhũm Tĩrtũm tee ri mẽ omu nê mẽ hpãnhã mẽ pakaxyw Krata xãm nê kãm:

—Nà kapxipix mẽ kurom ate tãm amnhĩ nhĩpêx o apa jakamã kapxipix kot kaj mẽ hpãnhã mẽ ho

ixwÿr o apa rãhã ho rãhã. Anê.

8

Jejus kêp mē pahto Tĩrtũm wÿr xwÿnh maati hã harēnh

Rukre 22.20; Sikũn Korĩt 3.6-11

¹ E kot paj axtem tanhmã mē amã mē pahto Tĩrtũm wÿr xwÿnh maatita jarēnh to ka mē inhma. Na hte kaxkwa kamã Tĩrtũm nhĩhkô hã hkrĩ. ĩhkô hã kêp Pahi Maati hã hkrĩ xã hã upôk rũm hkrĩ ho hkrĩ.

² Wam patre maatijaja na prem Tĩrtũm nhõrkwÿ kaàkre wÿr mra nē kamã hitom maati kamã mē ho Tĩrtũm wÿr o pa. Nom nhũm Jejus na hte mē kurom kaxkwa kamã Tĩrtũm nhõrkwÿ mex kãm mē pahto àhwÿr o hkrĩ. Őrkwÿ kaàkreja na prem ĩhkra ho hipêx nom kaxkwa kamã ōrkwÿ mexja na pre mēhõ ĩhkra ho hipêx kêt nē. Tĩrtũm na pre tanhmã hipêx to nhũm kamã Jejusja mē pahto hwÿr o hkrĩ.

³ Nē mē pahpê Ijaew nhõ patre maatijaja na prem mē ho hwÿr kaxyw nē mē kot amnhĩ tomnuj pãnhã Tĩrtũm mã mēmoj nhõr kôt mē ho kuwÿ. No Kris na hte ã amnhĩ nhĩpêx anhÿr kêt nē. Ra htyk o kot kãm amnhĩ nhĩ nhõr jakamã na hte wam patre maati pyrã nē xatã kãm mēmoj nhõr kêt nē.

⁴ Tã na hte arĩ Ijaew Mojes kapêr kôt amnhĩm Rewi hkwy kêp mē õ patre kaxyw mē unhwÿ nhũm mē ho Tĩrtũm wÿr o pa. No Jejus kêp Rewi hkanrêhã htãmnhwÿ hkêt. Katorxã hkôt kêp Juta hkanrêhã htãmnhwÿ jakamã kop apu arĩ jar pika ja kamã htĩr nē pa ronhÿx Ijaew nhõ patre pyrã nē kêp mē ho Tĩrtũm wÿr o pa xwÿnh kêt. ãm Rewi

hkanrêhã htàmnhwỳ pixjaja na htem mẽ kaxyw kãm mẽmoj gõ nê hkôt mẽ ho kuwỳ.

⁵ Jar na htem arĩ ã amnhĩ nhĩpêx anhỹr o pa nom kaxkwa kamã na htem ã amnhĩ nhĩpêx anhỹr hkêt nê.

Nê jar Tĩrtũm nhõrkwỹ kaàkreja te kot kaxkwa kamã õrkwỹ mexta pyrãk. Na pre Mojes õrkwỹ kaàkre nhĩpêx kaxyw nhũm Tĩrtũm tanhmã kãm hã karõ hto nê kãm:

—E jãã hixêt prêk nhĩmõk ã axãmta ã na pa pre amã ixkreta kukamã ixprĩ hã tanhmã mẽ ate hipêx to hã amã karõ. Tã kêr ka ã hipêx anê. Anê.

Hãmri nhũm kuma nê kot kãm hã karõ xà hkôt hipêx. Hãmri nhũm mẽ õ patre maati ixkreja kamã mẽ ho Tĩrtũm wỳr o pa. Na prem ã amnhĩ nhĩpêx anhỹr o pa.

⁶ Tã nhũm ra Tĩrtũm axtem mẽ hpãnhã mẽ pakaxyw Kris xãm nhũm hte mẽ pahto hwỳr mex o wantajê jakre. Na hte kaxkwa kamã mẽ pahpiitã mẽ pahpumunh mex rãhã ho hkrĩ nê wantajê rom tanhmã mẽ pahkrã hto pu mẽ tãm amnhĩ nhĩpêx o ri papa. Tĩrtũm kot finat Mojes mã kapêrja mex nê nom axtem na pre. Tã kapêr nyw na mex o kot wam kapêr jakrenh. Kapêr nyw kôt kot puj mẽ pahtyk tã akupỹm pahĩr nê nhỹrmã Tĩrtũm mẽ Jejus wa kuri pamex nê pahĩr tũm nê papa ho papa nê axte pahtyk kêt nê.

⁷ Kêp apu Tĩrtũm kot Mojes mã kapêr kôt mẽ kot tãm amnhĩ nhĩpêx o pa ronhỹx pre Tĩrtũm axte kapêr nyw ã kagã hkêt nê.

⁸ Nom wam kapêr tũmta na pre mẽ mar tỳx htã arĩ amnhĩ tomnuj rãhã ho pa nhũm tee ri ja hã mẽ omu nê mẽ kãm:

Nà kot paj axte nhÿrmã mẽ apê Ijaew mã axtem tanhmã ixkapêr to.

⁹ Amnepêm mẽ anhîgêjtê mã na pa pre ixkapêr.

Na pa pre Ejit pê mẽ kator nê mẽ kot tanhmã amnhĩ nhĩpêx to ho pa kaxyw tanhmã hã mẽ kãm karõ hto.

Nom na prem ixkapêr ma nê ãm kuma nê ixkôt amnhĩ nhĩpêx kêt nê. Pa tee ri ja hã mẽ omu hãmri nê mẽ hkaga.

¹⁰ Tã kot paj mẽ apê mẽ hkanrêhã mẽ htãmnhwÿ nywjê mã axtem ixkapêr ka mẽ ixkapêr nywja ma.

Kot paj nhÿrmã tanhmã mẽ akrã hto ka mẽ ixkapêr nyw mar tÿx nê hã ano htÿx nê ho apa.

Nê akĩnh nê apa.

Nê ixkôt ri amnhĩ nhĩpêx mex o apa.

Nê axpên mã ijarênh o: “Nà ãm hãmri Tĩrtũm kêp mẽ panhõ Tĩrtũm na.” Anhÿr o ri axpên mã ijarênh o apa.

Pa amnhĩ tã mẽ ama nê mẽ apumu nê amnhĩ xwar mẽ apê ixkra hã amnhĩm mẽ ajarê.

¹¹ Kot kaj mẽ apiitã ixte amnhĩ nhĩpêx kôt ixpumunh mex o ri apa. Mẽ akàxpore rũnh xwÿnhjaja nê mẽ akàxpore hkryre xwÿnhjaja mẽ apiitã ixpumunh mex jakamã kot kaj mẽ ri axte ixtã tanhmã axpên kukjêr to ho ri apa hkêt nê.

¹² Nê kot paj mẽ ato mex rax o ixpa.

Nê axte tanhmã mẽ ate amnhĩ tomnu hto ho apaja mã ijamaxpêr kêt nê. Anê.

¹³ Nê koja mẽmoj ra htũm hãmri nê hapêx tokyx anê. Ja pyrà nê na pre Tĩrtũm mẽ pamã kapêr tũmta jarênh o:

—E kêr ka mẽ axte ixkapêr tûm mar kêr nê. Pãnã ixkapêr nyw pix mãn mar o apa nê ãm kôt pix mã mãn amnhĩ nhĩpêx rãhã ho ri apa. Anê.

9

Tĩrtũm nhõrkwỹ kaàkre jarênh

¹ Nê amnepê m na pre finat Mojesja mẽ panhĩgê t nê mẽ pahpãmjê mã tanhmã Tĩrtũm nhõrkwỹ kaàkre jarênh to. Tanhmã mẽ kot hipêx to nê kamã tanhmã amnhĩ nhĩpêx to hã mẽ kãm karõ. Nê kamã tanhmã mẽ kot amnhĩ to Tĩrtũm wỳr to hã mẽ kãm karõ. Nê tanhmã mẽ hkwỳjê ho hwỳr toja nhũm pre mããnên mẽ kãm hã karõ. No Tĩrtũm nhõrkwỹ kaàkreja kêp õrkwỹ kumrêx kêt. ãm mẽ kot omunh nê kaxkwa kamã õrkwỹ kumrêx mã hamaxpêr kaxyw na pre.

² Jakamã nhũm prem Mojes kapêr ma nê hipêx. Kamã hitom hamêxkrut. Wam hitom kamã na pre kanê hprêêti xãm nê kutã mêsti xãm. Nê mêsti nhĩmõk ã Tĩrtũm mã õ pãwti jaxwỳ. Mẽ panhõ patre na pre htem Tĩrtũm mã kugõ nê mêsti ã kãm haxwỳ hãmri nê hkwỳjê ho kuwỳ. Tã hitom ja na prem kêp Tĩrtũm nhõ hitom mex ã harê.

³⁻⁴ Nê hitom wa hkaêx kãm na pre kupêxê ho hakwakre kahê xàja ajê t. Haturxà kamã hitomja na prem Tĩrtũm nhõ hitom maati hã harê. Tĩrtũm na pre te hirã htỳx kãm hwỳr wrỳ nê te kamã hkrĩ pyrãk. Nê kamã na pre Tĩrtũm mã mẽhkuxwa xà ho xê t xà hã mês kunĩhtija kuhê. Na prem ôr o hipêx nê kamã ãm nhũm kuhê. Nhũm pre hte mẽõ patre hwỳr agjê nê kutã kuhê nê mẽ ho Tĩrtũm wỳ. Nê mês kunĩhti haxwỳja hitom maati kamã kuhê. Na

prem pĩ ho hipêx nê ôr o hpro nê kamã ãm. Mêstija kaxwýnh kãm na pre htem mẽmoj jagjê.

Tĩrtũm kot Ijaew mã tanhmã mẽ kot amnhĩ nhĩpêx to ho pa hã karõ nê kên po hã mẽ kãm hã kagàja nhũm prem kamã kuxà nhũm hikwỹ.

Nê mããnên ôr o xijereja xà nhũm hikwỹ. Nê xijere kamã amnepê mã Tĩrtũm kot kaxkwa rũm mẽ hwỳr mẽõ rênh kwỳ hikwỹ. Mẽõja mẽ kot kãm: “Manã” anhỹr xwýnhja na prem hkwy hkawrà nê xijere kamã kugjê hãmri nê mẽsti kamã kuxà.

Nê finat Arãw nhõ kô kot ho amnhĩ kaxpar xà htũmta nhũm prem kamã kuxà. Tĩrtũm kot tanhmã ho nhũm kurũm pixôrà muxre hapôx xwýnhhta nhũm prem mããnên mês kunĩhti kamã kuxà nhũm hikwỹ.

⁵ Nê himök ã Tĩrtũm kapêr o wrýk xwýnh wa hkarõ nhĩpêxja wa hamêxkrut nê axpên kutã wa hkôn krã ho hkrĩ. Axpên wỳr hara koror nê wa hkrĩ. Patre maati kot omunh nê Tĩrtũm kot mẽ hkôt pa ho paja mã hamaxpêr kaxyw. Nê wa hkaêx kãm ahkaprýja Tĩrtũm kot mẽ nê mẽ kot amnhĩ tomnuj rênh mã hamaxpêr xà na pre.

À Tĩrtũm nhõrkwỹ kaàkre kot anhỹr. No kot paj ixprĩ hã mẽ amã piitã harênh par kêt nê.

⁶ Na pre hte mẽõ patre apkati mẽ wam hitom wỳr agjê nê kamã Ijaew ho Tĩrtũm wỳr o pa.

⁷ No hitom maatiã ãm mẽ õ patre maati pix na pre hwỳr agjê. Nom apkati mẽ hwỳr pa nê gjêx kêt ãm amgrà pýnh kãm hwỳr gjêx pýnh nê. Nê hwỳr gjêx kaxyw nê mẽmo mry pa nê hkamrô ru nê o

pa nê hitom maati hwÿr ho agjê. Hâmri nê ho mês kunĩhti nhĩmøk kamĩ nê Tĩrtũm mã kãm:

—Pa Tĩrtũm. E ota mry kamrôta. Mẽ ixpê akwÿjaja mẽ ixte amnhĩ tomnuj jakamã na pa mẽ amnhĩ pãnhã mẽmo mry nhõkre jakà nê kupĩ nê hkamrô ru nê man awÿr o mra. Te kot mẽ ixte amnhĩ tomnuj mÿrapê htyk pyræk. Jakamã kwa ã mẽ ixte amnhĩ nhĩpêx anhÿrja ã mẽ ixpumunh hkôt mẽ inhnê mẽ ixte amnhĩ tomnuj rê.

Anhÿr o mẽ amnhĩ to kuwÿ.

⁸ Nê patre maati pix na pre hitom maati ja wÿr agjê nê mẽ ho Tĩrtũm wÿ. Ijaew na prem ixkre kapem hamâr o kuhê nê hwÿr gjêx kêt nê. Tĩrtũm Karô kot hã mẽ kãm karô xà hkôt. Te Tĩrtũm pê amÿm kuhê pyræk. Tã na htem jarãhã arĩ Ijaew kanrêhã mẽ hkra nê mẽ htãmnhwÿjaja ã amnhĩ nhĩpêx anhÿr o pa. Jao mẽ higêtjê pyra nê Tĩrtũm pê amÿm kuhê.

⁹ Mẽ kot arĩ Tĩrtũm mã mry hpar nê hkamrô ho mẽmoj kamĩr nê amnhĩ to hwÿr o pa htã na htem arĩ hamaxpêr punuj pix o pa.

¹⁰ Tĩrtũm kapêr tũm kot tanhmã mẽmoj tã mẽ kãm karô hto.

Na pre tanhmã mẽ apkur xà hã mẽ kãm karô hto nhũm htem pix kur o pa.

Nê tanhmã mẽ hkôm xà hã mẽ kãm karô hto nhũm htem pix o hkôm o pa.

Nê tanhmã amnhĩmnuj to hã tanhmã mẽ kot amnhĩ kuhõnh to hã karõja nhũm htem hkôt pix mã tanhmã amnhĩ kuhõnh to ho pa.

Nê tanhmã mẽ kot ri mẽ hikukrêx kuhõnh to hã mẽ kãm karõja nhũm htem kôt pix mã tanhmã kuhõnh to ho pa.

Ã na pre Tirtûm Kris kukamã mẽ kãm mẽmoj tã karõ rax anẽ. Kris kutêp pix mã ã mẽ kot amnhĩ nhĩpêx anhÿr kaxyw. No mẽ pahte arĩ ã amnhĩ nhĩpêx anhÿr kaxyw kêt. Na pre ra Kris mẽ pahwÿr wrÿ nẽ Tirtûm kapêr tûm o hapêx nẽ hpãnhã mẽ pamã kapêr nyw jarẽ pu mẽ hpãnhã nywta kôt pix mã amnhĩ nhĩpêx o papa. Kapêr nywja mex o mex. Nẽ mex o wamta jakrenh.

Kris htyk o mẽ pahte amnhĩ tomnuj pãnhã amnhĩrer ã harênh

¹¹Tã na pre Krisja tãm mẽ pahwÿr wrÿ nẽ kêp mẽ pahto Tirtûm wÿr xwÿnh maati nẽ patre hpãnhã mẽ pahto hwÿr o pa. Nom jar pika ja kamã mẽ kot mẽ ãkra ho Tirtûm nhõrkwÿ kaàkre nhĩpêxta wÿr àr nẽ kamã mẽ pahto hwÿr kaxyw na pre wrÿk kêt nẽ. Na pre ra akupÿm kaxkwa hwÿr api nẽ kamã õrkwÿ mex wÿr axà nẽ kamã tanhmã mẽ pahto mex to nẽ tanhmã mẽ pahto Tirtûm wÿr to rãhã ho hkrĩ.

¹²ã kaxkwa kamã Tirtûm nhõ hitom maati ja wÿr àr tipxi htã mẽ pahpiitã mẽ pahte amnhĩ tomnuj pãnhã amnhĩrer pa. Nom mẽmo mry kamrô ho mẽ pahpãnhã amnhĩrer kêt nẽ. Môx kamrô rÿ motre kamrô ho mẽ pahpãnhã amnhĩrer kêt nẽ. Amnhĩ kamrô ho na pre mẽ pahpãnhã amnhĩre. Tyk nẽ hkamrô pikapĩrta o mẽ pahpiitã mẽ pahpãnhã amnhĩrer pa.

¹³Nẽ amnepêm Ijaew kot Tirtûm kapêr tûm kôt amnhĩ nhĩpêx mex o pa hkêt jakamã nhũm tee ri mẽ omu nẽ mẽ kot amnhĩ tomnuj o mẽ pa xwÿnh ã mẽ harẽ. Jakamã na pre mẽõ patre xatã mry kamrô ho mẽ hkamĩ. Môx kamrô nẽ motre kamrô ho mẽ hkamĩ. Na pre môx krare hkwÿ hpa nẽ

ho hxêť nê hprà ho hkwỳjê kamĩ. Ǻ na prem xatã mẽ hipêx anhỹr o pa. Tĩrtũm kot ja hã mẽ omunh nê mẽ mex ã mẽ harênh kaxyw. Nom te mẽ krãhkã pix mex pyrã nê mẽ hkrã kaxwỳnh kãm arĩ hamaxpêr punuj o pa.

¹⁴ ã na prem amnhĩ nhĩpêx anhỹr o pa. Nom Krisja mẽ kurom aa tanhmã amnhĩ tomnuj to hkêť jakamã na pre mẽ pahte amnhĩ tomnuj xwỳnhjê nê ty. Te mẽ kot amnhĩ nê môx rỳ motre hpar nê hkamrô runhta pyrãk o amnhĩ nhĩpêx nê mẽ panê Tĩrtũm mã amnhĩ gô nhũm pre mẽ kãm hkurê xwỳnhjaja kupĩ. Na pre Tĩrtũm Karôja ã kot mẽ panê htyk anhỹr kaxyw tanhmã ho hihtỳx to. Karôja aa hapêx kêt kumrêx rãhã nê pa ho pa xwỳnh jakamã na pre Kris tykja kukamã tanhmã ho hihtỳx to nhũm mẽ panê ty. Tapxipix na mẽ pahte tãm amnhĩ nhĩpêx o papa kaxyw kêp tanhmã mẽ pahkrã hto xwỳnh. Jakamã na pu htem ra pajamaxpêr nyw o pajamaxpêr o papa nê pajamaxpêr o:

—Na pa pre tee ri inhmã amnhĩ krã hkôt tãm amnhĩ nhĩpêx o ixpa hprãm kaprỳ nê ãm amnhĩ tomnuj pix o ri ixpa. Tã Kris kot inhnê htyk o hkamrô pikapĩr ã harênh ma nê amnhĩ kaxyw hkôt ijamaxpêr tỳx nê nhũm amnhĩ tã ixpumu nê ixte tãm amnhĩ nhĩpêx o ixpa kaxyw ixãm. Jakamã kot paj ãm Tĩrtũm pix mã kãm tanhmã amnhĩ nhĩpêx to ho ri ixpa. Tĩr rãhã nê pa ho pa xwỳnh jakamã kot paj nhỹrmã kuri urãk nê ixtĩr tũm nê ixpa ho ixpa. Anê.

¹⁵ Nê amnepê mã na prem piitã Tĩrtũm kapêr tũm kôt amnhĩ nhĩpêx mex o pa hkêť nê. Mẽ kot xatã hkôt amnhĩ nhĩpêx o pa hã amnhĩ jarênh tã

hkôt amnhĩ nhĩpêx kêt nê. Jakamã na pre Kris wry nê mẽ pahte hkôt amnhĩ xunhwÿr mã xwÿnhjê mã Tĩrtũm kapêr nyw jarê nê mẽ pamã:

—Kot paj mẽ anê ty nhũm Tĩrtũm ã ixte amnhĩ nhĩpêx anhÿrja kukwak ri mẽ ato mex rãhã ho pa. Anê.

Hãmri nê amnhĩ jarênh xà hkôt mẽ pahte amnhĩ tomnuj piitã hpãnhã amnhĩrer kaxyw mẽ panê ty.

¹⁶⁻¹⁷ Te jar pika ja kamã mēhō htyk kukamã hkrajê mã tanhmã amnhĩ jarênh to pyræk. Na htem htyk kaxyw nê hkrajê mã:

—Nà kot paj mẽmo arĩgro hã ty ka mẽ inhmÿr pê ixpê ixkukrêx kwÿ o arĩk.

Anhÿr o na htem amnhĩ jarê. Hãmri nê ty nhũm hkrajaja amnhĩm õ mẽmoj to arĩk pa. Mẽ hipêêxà kukwak ri mẽ hikukrêx mex nê mÿr pê o pa. No kormã htĩr ri nhũm mẽ kormã kêp hamÿnh kêt nê. Ja pyrà nê na pre Tĩrtũmja Jejus htyk kukwak ri tanhmã mẽ pahto mex to pu mẽ kukwak ri mẽ pamex nê pahkĩnh nê ri papa.

¹⁸ Nê Tĩrtũm kapêr tũm kôt na pre hte mẽ õ patre mry pa nê ãm hkamrô runh kôt pix mã mẽ ho Tĩrtũm wÿr o pa nhũm amnhĩ tã mẽ omunh xà hkôt mẽ kuma nê tanhmã mẽ ho mex to.

¹⁹ Na pre finat Mojesja Ijaew mã Tĩrtũm kapêr tũm piitã harê nê harênh pa hãmri nê mōx õxpĩ nê kaxyw motre hōxpĩ. Hãmri nê xijere kamã hamê wa hkamrô runh pa nê kamã gō hkwy ru. Hãmri nê kaxyw mẽmo pĩ hpa hkryre pê “isop” jarênhja kwÿ kukê. Nê kaxyw ôwêhti hkĩ kamrêkre hkwy hpy nê isop mẽ ho pihkàr pa nê mry kamrô o go. Hãmri nê ho hkwyjê kamĩ. Nê ho Tĩrtũm kapêr ã kagà tũmta kamĩ.

20-22 Hāmri nē ho anhÿr pa nē mē kām:

—Nà na Tĩrtũmja ixte mry kamrô ho mē akamĩr pumunh kôt mē pamã kapêr o: “E kot kaj mē ixkapêr kôt amnhĩ nhĩpêx o ri apa hã kot paj tanhmã mē ato mex to rãhã ho ri ixpa ka mē amex nē akĩnh nē ajamakêtkati nē ri apa. Jakamã kêr ka mē mry kamrô ho mēmoj piitã hkamĩr pa. Nē ho amnhĩ kamĩ. Kêr pa ja hã mē apumu hãmri nē axte tanhmã mē ate amnhĩ tomnuj tota mã ijamaxpêr kêt nē.” Anē. ã na Tĩrtũm mē pamã kapêr anē. Anē.

Hãmri nē hpãnhã mry kamrôta o ôrkwÿ kaàkre kamĩ. Nē hkre kamã mēmoj kuhê xwÿnh piitã nhũm ho hkamĩr pa. ã na pre mē ô patre mē mex kaxyw mē hipêx anhÿr o pa. Mē kot tōhã mēmoj to hpÿnhre nē ho hkamĩr kêt jakamã kironhÿx pre mēmoj piitã ã hipêx anhÿr o pa. Kop apu mē kot mry hpar nē hkamrô runh kêt ronhÿx pre Tĩrtũm arĩ mē kot amnhĩ tomnuj mã hamaxpêr rãhã ho pa.

²³ Na prem ã Tĩrtũm nhõrkwÿ kaàkre kamã mēmoj kuhê xwÿnh piitã mex kaxyw hipêx anē. Te Tĩrtũm kot mē pahto mex nhũm mē pahte nhÿrmã ma kaxkwa hwÿr ô krĩ hwÿr paxàpirta pyrã nē. Nom mē kot mry hpar nē hkamrô runhta kukwak ri mē pamex nē papa hkêt. ãm mēhõ kamrô kukwak ri mē pamex xwÿnhhta pix kukwak ri na mē pahpê pahÿr tũm nē papa mã xwÿnh. Ja na mex o mry kamrô piitã hakrenh pa.

²⁴ Jejus Krisja pix kukwak ri. Tãm na pre patre pyrã nē mē pahto Tĩrtũm wÿr kaxyw mē ìhkra ho Tĩrtũm nhõrkwÿ kaàkre nhĩpêxta wÿr gjêx kêt nē. ãm ixkre kaàkre pix na pre. Na pre kaxkwa kamã

Tĩrtũm nhõ krĩ hwỳr axà. Tã arĩ kamã Tĩrtũm nhĩhkõ hã mẽ pahto hwỳr rãhã ho hkrĩ.

²⁵ Nẽ Ijaew nhõ patre maati na hte amgrà mẽ òrkwỹ kaàkre kamã hitom maati hwỳr gjëx tipxi. Nẽ amnhĩ kôt mry kamrô ru nẽ ho agjê. Tĩrtũm kot hã omunh nẽ axte mẽ kot amnhĩ tomnuj mã hamaxpër hkêt kaxyw. Nom Kris na pre mẽ uràk nẽ mẽmo mry pa nẽ Tĩrtũm mã hkamrô kapĩr kêt nẽ. Kamrô na pre mẽ panê axkapĩ. Nom patre pyrà nẽ amgrà mẽ ã amnhĩ nhĩpêx anhỹr kêt nẽ. Na pre htyk o Tĩrtũm mã amnhĩ nhõr tipxi.

²⁶ Kêp apu patre pyrà nẽ amgrà mẽ mẽ panê htyk o pa ronhỹx ra mẽ panê htyk xohtô rax kumrêx. Nhỹx pre amnepê mã Tĩrtũm kot mẽmoj piitã ho karta rũm amgrà mẽ mẽ panê htyk o pa ho hkraax. Jao xatã htyk o amgrà xohtô rax kumrêx. Nom ja kot anhỹr kêt. Na pre mẽ pahwỳr wrỳ nẽ mẽ panê htyk tipxi htã htykja o mẽ pahte amnhĩ tomnuj piitã hpãnhã amnhĩrer par kumrêx. Jakamã mo kaxyw koja axte ty?

²⁷ ãm pahtyk tipxi htã koja Tĩrtũm nhỹrmã akupỹm mẽ pahpiitã mẽ pahto pahtĩr nẽ ahpỹnhã tanhmã mẽ pajarênh to nẽ ahpỹnhã tanhmã mẽ panhĩpêx to. Kormã mẽ pahtĩr ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to.

²⁸ Ja pyrà nẽ na pre Krisja ãm mẽ panê htyk tipxi htã mẽ pahto ohtô nẽ mẽ panê mẽ pahte amnhĩ tomnuj piitã rênh pa. Hãmri nhũm Tĩrtũm akupỹm ho htĩr nẽ akupỹm amnhĩ wỳr ho api. Tã koja nhỹrmã akupỹn mẽ pahwỳr wrỳ. Nom axte mẽ pahte amnhĩ tomnuj pãnhã amnhĩ rer kaxyw mẽ panê htyk kaxyw wrỳk kêt nẽ. Ra kot mẽ pahte

amnhĩ tomnuj pãnhã amnhĩrer kênã. Koja akupÿn wrÿ nẽ mẽ pahte amnhĩ wÿr kamã pajamak o papa xwÿnhjaja ma akupÿm amnhĩ kôt kaxkwa hwÿr mẽ pahto àpir pa. Ra mẽ pahtyk tã nhÿm akupÿm mẽ pahto mẽ pahtĩr nẽ ma amnhĩ kôt mẽ pahto àpir pa pu mẽ kuri pamex nẽ pahtĩr tÿm nẽ papa ho papa.

10

Kris kot mẽ panê htyk tipxi hã harênh

¹ Nẽ arĩ mẽ kot Tĩrtÿm kapêr tÿm kôt amnhĩ nhĩpêx o mẽ pa xwÿnhjaja kormã hprĩ hã Tĩrtÿm kot tanhmã mẽ pahto mex to hã harênh mar tÿx kêt. Na prem kormã hkwÿ pix ma. Na hte mẽ õ patreja amgrã mẽ kãnhmã kaxkwa hwÿr mry kamrôta pẽ nẽ mẽ amnhĩ to Tĩrtÿm wÿ. Kot ja hã mẽ omunh nẽ axte mẽ kot amnhĩ tomnuj mã hamaxpêr hkêt kaxyw. Tã ã mẽ kot amnhĩ nhĩpêx anhÿr tã arĩ Tĩrtÿm kapêr kwÿm amnhĩ nhĩpêx rãhã

² jakamã na prem xatã kãm mẽmo mry kamrô runh o pa. Kêp apu tãm amnhĩ nhĩpêx nẽ tãm ri hamaxpêr ronhÿx arĩ ã amnhĩ nhĩpêx anhÿr o pa hkêt nẽ. Nẽ xatã amnhĩ pãnhã mry hpar nẽ hkamrô ho Tĩrtÿm nhõrkwÿ kaàkre kamã mẽmoj kamĩr kêt nẽ.

³ Nom na prem tãm amnhĩ nhĩpêx o pa hkêt nẽ. Mẽ kot amgrã mẽ Tĩrtÿm kot mẽ nẽ mẽ kot amnhĩ tomnuj rênh kaxyw mẽ kot kãm mẽmo mry hpar o pa htã no ãm hkôt amnhĩ nhĩpêx xwÿnh ã amnhĩ jarênh kêt nẽ. Arĩ mẽ kot amnhĩ tomnuj o pa jakamã na prem mry hparta ã amnhĩ pumu nẽ tee ri amnhĩ kukamã hamaxpêr o hkaprĩ nẽ pa.

⁴ Nom na hte môx kamrô rÿ motre kamrôja mẽ panê mẽ pahte amnhĩ tomnuj rênh kêt nẽ.

5-8 Jakamã na pre Krisja mẽ pahwÿr nojarêt nê Tĩrtũm mã amnhĩ jarênh o:

Pa Tĩrtũm? E kot paj ma mẽ hwÿr wrÿ.

Mẽ kot amnhĩ pãnhã amã mry hparta apê hprãm nõkati nê amã hkĩnh kêt.

Ate mẽ nê mẽ kot amnhĩ tomnuj rênh kaxyw mẽ kot amã mẽmo mry hparta amã hprãm kêt.

ãm ixkukamã na ka pre ã mẽ kot amnhĩ nhĩpêx anhÿr kaxyw mẽ kãm ja hã karõ.

Mẽ kot mry nhĩpêx o te pa ixte mẽ nê ixtyk nê ixkamrõ pikapĩr pyræk o na prem ixkukamã ã amnhĩ nhĩpêx anê.

Jakamã na ka ra mẽ kaxyw inhmã inhĩ gõ pa mẽ uræk nê inhĩ ho inhĩ.

Tã kot paj ma mẽ hwÿr wrÿ. Ixte amã hprãm xà hkõt pix mã ixte tanhmã amã mnhi nhĩpêx to ho ixpa kaxyw. Akapêr ã kagà htũm kot tanhmã ixkukamã ijarênh to xà hkõt kot wrÿ nê ã amã amnhĩ nhĩpêx anê. Anê.

Hãmri nê man mẽ pahwÿr wrÿ.

⁹ Kot Tĩrtũm kapêr tũm o hapêx par nê hpãnhã tãm mẽ panê htyk kaxyw wrÿ. Jakamã na pre nojarêt nê Tĩrtũm mã amnhĩ jarênh o:

—E ixte amã hprãm xà hkõt amnhĩ nhĩpêx kaxyw kot paj ma mẽ hwÿr wrÿ.

¹⁰ Anhÿr jakamã wrÿ nê Tĩrtũm kãm hprãm xà hkõt mẽ panê ty. Na pre nhãm mẽhõ mẽ kãm hkurê xwÿnhjê mã õr nhũm mẽ kot hpĩr nhũm amarĩ htyk kêt nê. Na pre amnhĩ grõnh kõt mẽ kãm amnhĩ gõ nhũm prem kupĩ. Hãmri nhũm htyk o mẽ pahte hkõt amnhĩ xunhwÿr xwÿnhjê o Tĩrtũm kra. Mẽ kot xatã mry hparta rom htyk tipxi tã mẽ pahpiitã mẽ pahte amnhĩ tomnuj pãnhã amnhĩrer pa.

¹¹ Nê mẽ õ patrejaja na htem apkati mẽ Tĩrtũm nhõrkwỹ kaàkre kamã kãm tanhmã amnhĩ nhĩpêx to. Nê apkati mẽ hkwỹjê hpãnhã mry hkwỹ hpa nê hkamrô ru nê mẽ ho Tĩrtũm wỹ. Tã nom ja hã mẽ omunh xà hkôt mẽ nê mẽ kot amnhĩ tomnuj rênh kêt nê.

¹² No kêt Kris na pre mẽ kot xatã mry hpar xwỹnhta rom ãm htyk tipxi htã mẽ pahte amnhĩ tomnuj piitã hpãnhã amnhĩre. Hãmri nê ma akupỹm kaxkwa hwỳr api nê Tĩrtũm nhĩhkô hã Pahi Maati hkrĩ xà kamã upôk rũm hkrĩ ho hkrĩ.

¹³ Kojã kuri hkrĩ rãhã nhũm Tĩrtũmja ãhkram mẽ kot kutã amnhĩ xunhwỳr xwỹnhjê jaxàr pa. Ja kaxyw na kormã kuri hamãr o hkrĩ.

¹⁴ ãm htyk tipxi htã htykja o mẽ pahte hkôt amnhĩ xunhwỳr xwỹnhjê ho Tĩrtũm kra pu mẽ ra hpãnhã tãm amnhĩ nhĩpêx rãhã ho papa. Nê pajamaxpêr mex o ri papa. Tĩrtũm kãm hprãm xà hkôt.

¹⁵ Amnepêr mẽ kot Tĩrtũm nhỹ hã kapêr jarênh o mẽ pa xwỹnhjaja na prem mẽ panhĩgêjtjê mã kapêr o pa. Tĩrtũm Karõ nhỹ hã mẽ kãm kapêr nê mẽ kãm:

¹⁶ —E na Tĩrtũm mẽ pamã amnhĩ jarê nê amnhĩ jarênh o:

Kot paj nhỹrmã axtem ixkapêr nyw o mẽ amã ixkapêr.

Nê mẽ akrãm hagjê ka mẽ mar tỳx pê hã ano htỳx nê ho apa.

Ixkapêr tũm na pa pre mẽ amã kên pota ã hã kagà. Nom ixkapêr nyw kot paj axtem mẽ akrãm hagjê.

¹⁷ Nê kot paj axte mẽ ate amnhĩ tomnuj mã ijaxmaxpêr kêt nê.

Anhÿr o mẽ pamã amnhĩ jarênh. Anẽ.

¹⁸ Tã ra axte mẽ pahte amnhĩ tomnuj mã hamaxpêr kêt ã kot amnhĩ jarênh jakamã mo kaxyw kot pu mẽ arĩ amnhĩ pãnhã kãm mẽmo mry hpar nẽ hkamrô runh o papa? Tã mẽ pahkwÿjaja na hte arĩ kãm ja ho anhÿr prãm o pa. E kwa mẽ axte ã amnhĩ nhĩpêx anhÿr kêt nẽ ixkwÿjaja.

Akupÿm mẽ pahte amnhĩ nhĩpêx tũm o paxujanãr kêt ã mẽ pamã karõ

Matêwre 27.51; Rukre 23.45; Rõmãn 5.1-2; Epes 3.12; Eprêw 4.14-16

¹⁹⁻²⁰ E ixkrãmnhwÿjaja. Ra Jejus kot mẽ panê htyk o hkamrô pikapĩr jakamã na pu htem arĩ tee ri amnhĩ kukamã pajamaxpêr hkêt nẽ. Tĩrtũm axte kot mẽ pahte amnhĩ tomnuj mã hamaxpêr kêt jakamã na pu htem paxãmnhĩx amnhĩ to hwÿr o papa. Te paxãmnhĩx òrkwÿ kaàkre kamã hitom maati hwÿr pagjêx nẽ kamã amnhĩ to hwÿrta pyræk. Jao ra mẽ papamjaja amnhĩ to hwÿr o papa nhũm patre axte mẽ pahto hwÿr kêt nẽ. Jejus na pre htyk o mẽ pamã hitom maati wÿr hakwakre kahêxà hã kupêxêja kôt ã ho axkjê. Jao mẽ paxãmnhĩx hwÿr mẽ pagjêx kaxyw mẽ pamã kahê xà mẽ.

²¹ Tã ra kêp Tĩrtũm nhõ krĩ kamã mẽ pahto hwÿr xwÿnh maati na. Nẽ mex kumrêx o jar pika ja kamã patre kot mẽ ho hwÿr o pa xwÿnhta jakrenh.

²² Jakamã e kwa kêr pu mẽ mãmrĩ paxãmnhĩx amnhĩ to Tĩrtũm wÿr o papa. Ra Jejus kot mẽ panê htyk nhũm mẽ pahte amnhĩ kaxyw hkôt pajamaxpêr rãhã ho papa jakamã kêr pu mẽ axte mẽ pahpê amnhĩ tomnuj xwÿnh ã amnhĩ jarênh kêt

nê. Kêr pu mē nhÿrmã tanhmã pajamaxpêr punuj to rÿ tanhmã amnhÿ tomnuj to hãmri nê tee ri ja hã amnhÿ pumu nê pahkaprÿ kamã amnhÿ to Tÿrtÿm wÿr kurê kumrêx. Jejus ra kot mē pahte amnhÿ tomnuj pãnhã amnhÿrer par jakamã kot puj mē Tÿrtÿm mã tanhmã mē pahte amnhÿ tomnuj to hã amnhÿ jarê nhÿm mē pama nê axte kãm hamaxpêr kêt nê. Pu mē te paxwÿr nê pahte amnhÿ nê pagrã htyk kuhõnh par nê akupÿm pamex pyræk. Nê axte paxãmnhÿx amnhÿ to Tÿrtÿm wÿr o papa.

²³ Nê mē kot Kris ã tanhmã mē pahto htã kwa kêr pu mē tee ri amnhÿ kukamã pajamaxpêr kêt nê. Rÿ pajamaxpêr o:

—Konên. Koja mē tanhmã hamaxpêr to nê Kris ã ixpÿ rÿ ko. Pa apu mē kot ixpÿr pymaj akupÿm ixte amnhÿ nhÿpêx tÿm o awjanã nê akupÿm hkôt amnhÿ nhÿpêx japêr rÿ ko. Anê.

Kwa pu mē tee ri ã pajamaxpêr anhÿr hkêt nê. Pu kêt mē pajamaxpêr o:

—Nà mē kot Kris ã tanhmã ixto htã kot paj aa hkaga hkêt nê. Mē kot hã ixpÿr mã tã kot paj hkaga hkêt kumrêx.

Anhÿr ã amnhÿ jarê.

²⁴ Nê kêr ka mē akwÿjê mã anê kê mē mēmoj to axpên kutã nojarêt rãhã ho ri axpên kôt pa. Jao tanhmã axpên to mex to o ri axpên kôt pa.

²⁵ Na pre ra mē pahkwÿjaja tanhmã hamaxpêr to nê axte mē pahkôt pikuprõnh nê Tÿrtÿm kapêr mar o hkrÿ hkêt nê. No kêr pu mē ho mē uræk kêt nê. Kêr pu mē arÿ xatã axpên wÿr akuprõ nê mē pahte tee ri amnhÿ kukamã pajamaxpêr nê axpên mã pakapêr o papa. Kêt mē panhõ Pahihtija ra akupÿn mē pahwÿr wrÿk kaxyw jakamã kwa kêr

pu mẽ kutêp arĩ axpên mã pajamaxpêr mex nhôr pê tãm axpên nhĩpêx mex rãhã ho i papa.

26 Mẽ pahkwỳjaja kot Tĩrtũm kapêr mar mex tã na htem kuma nẽ ãm kuma. Kwa kêr ka mẽ ho mẽ uràk kêt nẽ. Kris kot mẽ panê htyk ã harênhja mẽ kot mar mex tã na htem kuma nẽ ãm kuma nẽ hkaga kumrêx. Jakamã mēhõ koja Kris pyrã nẽ htyk o mẽ kot amnhĩ tomnuj pãnhã amnhĩre? Nà amrakati kumrêx. ãm Jejus pix na pre Tĩrtũm ja kaxyw ãm. Tapxipix na pre ã mẽ panê amnhĩ nhĩpêx anê. Tã nhũm mẽ kot hkagaja mỳrapê koja mẽ nhỹrmã mẽ tãmjaja mẽ kot amnhĩ tomnuj pãnhã amnhĩre.

27 Mẽ kot Tĩrtũm kutã amnhĩ xunhwỳr xwỳnh na mẽ. Amnepêm na pre Tĩrtũm mẽ kot kutã amnhĩ xunhwỳr xwỳnhjê kaxyw mẽ kot amnhĩ xà htỳx kamã hamak tũm xàta nhĩpêx. Tã ra mẽ kot Jejus kaga jakamã koja nhỹrmã ma hwỳr mẽ rênh pa nhũm mẽ tee ri kãm hwỳr pa hprãm kêt kaprỳ.

28 Amnepêm finat Mojesja kormã htĩr ri na pre hte mēhõ pixi nẽ kapêr kaga nẽ akupỹm kot amnhĩ nhĩpêx tũm o awjanã nẽ tanhmã amnhĩ tomnuj to nhũm hkwỳjaja ja hã omu. Tanhmãn axkrut rỳ axkrunêpxi nẽ ja hã omu. Hãmri nẽ ma Mojes wỳr mra nẽ axpên kôt kãm tanhmã kot amnhĩ tomnuj to hã harê. Hãmri nhũm harênh ma nẽ mẽ kãm hã amỹnê nhũm tee ri kãm htĩr prãm kaprỳ. Mẽ kot akupỹm amnhĩ nhĩpêx tũm o ujanãr nẽ amnhĩ tomnuj o paja mỳrapê na prem mẽ kupa. ã na pre htem mẽ hipêx anhỹr o pa.

29 Nẽ koja mēhõ tanhmã Tĩrtũm Kra Jejus o kapêr punuj to. Tĩrtũm kapêr ã kagà htũm kot ra mẽ kot kêp Tĩrtũm Kra hã harênh mar mex tã axtem nẽ

tanhmã ho kapêr punuj to ho pa. Kot mẽ panê htyk nê hkamrô pikapîr kôt kot mẽ pahte amnhĩ tomnuj pãnhã amnhĩrer ã harênh mar tã kuma nê ãm kuma nê harênh o:

—Nà mẽ pahpyrà nê kot amnhĩ tomnuj xwýnh nhũm mẽ kot hã hpîr kênã. Na pre mẽ panê htyk kêt nê.

Anhÿr ã harê. Nê Tĩrtũm Karõja nhũm mãânên tanhmã ho kapêr punuj to. Kêp mẽ pakutã nojarêt xwýnh tã nhũm axtem nê tanhmã ho kapêr punuj to. Mÿrapê koja nhÿrmã Tĩrtũm tanhmã homnuj tÿx to. Homnuj tÿx o mẽ kot Mojes kapêr kaga nhũm mÿrapê kot mẽ hparta jakre. Jakamã kwa kêr ka mẽ ã amnhĩ nhĩpêx anhÿr hkêt nê.

³⁰ Tĩrtũm kapêr ã kagà htũm kot ja jarênh kot:

Ixpê Tĩrtũm kot paj mẽ kot amnhĩ tomnuj xwýnhjê homnuj tÿx nê. Anê.

Nê mẽ kot tãm amnhĩ nhĩpêx xwýnhjê jarênh kot:

Mẽ kot amnhĩ to mex o mẽ pa xwýnhjaja kot paj nhÿrmã mẽ ho mex rax nê. No mẽ kot amnhĩ tomnuj o mẽ pa xwýnhjaja kot paj nhÿrmã mẽ homnuj tÿx nê. Anê.

Ra mẽ pahte ã kapêr anhÿr xwýnhja kot amnhĩ nhĩpêx ã omunh mex.

³¹ Jakamã kwa mẽ okora. Kêr ka mẽ amnhĩ to mex rãhã ho ri apa. Tĩrtũm rãhã ho rãhã nê hihtÿx o hihtÿx jakamã koja mẽmoj tã akamã gryk ka amex kêt o amex kêt.

³² Nê amnepêm mẽ ate Jejus kôt amnhĩ xunhwÿr krax kãm na prem Jejus ã mẽ atomnuj tÿx tã ka prem mẽ umaj hkaga hkêt nê. Tã kêr ka mẽ arĩ ã amnhĩ nhĩpêx anhÿrja kukamã mãn ajamaxpêr nê

hã anohtỳx rãhã ho apa. Jao arĩ ã amnhĩ nhĩpêx anê nê mẽ umaj Jejus kaga hkêt nê.

³³ Na prem mẽ piitã mẽ noo mã tanhmã mẽ amã kapêr punuj to nê tanhmã mẽ anhipêx to. Nê tōhã tanhmã mẽ akwỳjê homnuj tỳx to ka mẽ tee ri ja hã mẽ omu nê mẽ kamã axukapřĩ nê. Nê mẽ hkôt axkamẽ nhũm prem mã mẽ ato anê nê.

³⁴ Na prem mẽ akwỳjê jagjê ka prem ja hã mẽ omu nê ma mẽ hagdjenh xà hã ixkre hwỳr mẽ hwỳr mra nê tanhmã mẽ ho mex to. Nhũm prem mẽ apê mẽ akukrêx kwỳptà nê ma amnhĩm o pa ka mẽ ãm amnhĩ tã mẽ omu nê ajamaxpêr o:

—Kwãr mẽ mãmri ma amnhĩm hamỳn o pa. Kojã nhỹrmã Tĩrtũm inhmã ixkukrêx mex o kot ja jakrenhta kwỳ nhõr rax nê pa amnhĩm hamỳ nhũm aa ixpê hapêx kêt nê. Hãmri nhũm axte mēhõ aa ixpê utàr kêt nê. Jar mẽ ixkukrêxta mexti hã. Anê.

Jao mẽ kot mẽ apê utàr tã ka mẽ akapřĩ nã apa hkêt nê. ã amnhĩ kukamã ajamaxpêr anhỹr pê akĩnh nê apa. ãm hãmri na ka prem ã amnhĩ kukamã ajamaxpêr anê.

³⁵ Na ka prem mẽ kutã amnhĩ to htỳx kãm ã apa anê. Tã kwa kêr ka mẽ arĩ ã amnhĩ nhĩpêx anhỹr o ri apa. Kêr kê nhỹrmã Tĩrtũm ja hã mẽ ato mex rax nê.

³⁶ Nê kêr ka mẽ arĩ amnhĩ kaxyw Tĩrtũm mã ajamaxpêr rãhã ho ri apa. Mẽ kot Jejus ã tanhmã mẽ ato htã ka mẽ hkaga hkêt nê. Kot kaj mẽ ã amnhĩ nhĩpêx anhỹr o apa nhũm Tĩrtũm ja hã mẽ apumu nhũm ja kãm mex nê. Hãmri nhũm ra kot amnhĩ jarēnh xà hkôt nhỹrmã amã mẽmoj mex nhõr rax nê. Jakamã kwa mẽ kot tanhmã

mê anhîpêx to hã amnhî pumu nê tee ri amnhî kukamã ajamxpêr o ri akaprî hkêt nê. Kot kaj mê Kris ã apunuj rãhã apa hkêt nê.

³⁷ Tirtûm kapêr ã kagã htûm kot Jejus jarênh kot: Koja mê pahwÿr wrÿk mã xwÿnhnta tokyx wrÿ. Na ra wrÿk kaxyw nojarê. Anê.

³⁸ Nê harênh kot: Ixkôt mê kot amnhî nhîpêx mex o mê pa xwÿnhjaja koja mê amnhî kaxyw ixkôt hamaxpêr tÿx rãhã nê. Jao nhÿrmã ixri htîr tûm nê mex rãhã nê pa ho pa.

Nê koja mēhō ixkaga pa tee ri kãm ixkînh kêt ã omu. Anê.

³⁹ No mê papajaja te mê pahte mê kot Jejus kaga nhûm kot amnhî tã mê homnuj mã xwÿnhjê pyrãk kêt. Arî mê pahte amnhî kaxyw hkôt pajamxpêr rãhã jakamã koja nhÿrmã amnhî wÿr mê pahto api.

11

Amnhî kaxyw Tirtûm kôt mê hamaxpêr mex xwÿnhjê jarênh

Sikûn Pêtre 3.5-7

¹ Nê na htem Kris ã mê panhîpêx kati ho pa pu mê pahpunuj rãhã nê ri papa. Te Kris kot mê pahto mex kêt pyrãk pu htem mēmoj punuj pix kãm ri papa nê kormã Tirtûm kot mê pahto mex ã amnhî tã omunh kêt nê. Tã ã mê pahte anhÿr tã kwa kêr pu mê arî kapêr kôt amnhî nhîpêx rãhã ho papa. Mê pahte pano ho Tirtûm pumunh kêt tã kot mê pahkôt pa ho pa hã amnhî kaxyw kãm pajamxpêr tÿx rãhã ho papa. Jakamã na pu htem ãm kapêr kôt pix mã amnhî nhîpêx o papa.

² Amnepê mã mẽ pakukamã mẽ panhĩgêtjaja na prem no ho Tĩrtũm pumunh kêt tâ amnhĩ kaxyw kãm hamaxpêr nê kapêr kôt amnhĩ nhĩpêx o pa nhũm amnhĩ tâ mẽ omu nhũm ja kãm mex nê.

³ Nê mẽ papajaja na pu htem pajaxwỳja mẽ pano ho omunh kêt tâ amnhĩm harênh o:

—Nà amnepê m kormã mẽmoj piitã amrakati ri nhũm Tĩrtũm ãm kapêr pix o mẽmoj piitã ho kato. Ixte inhno ho ja hã omunh kêt tâ kot ã amnhĩ nhĩpêx anhỹr ã amnhĩ jarênhja jakamã kot paj hkôt ijamaxpêr tỳx rãhã ho ri ixpa. Anê.

⁴ Na pre finat Atãw nhĩpêx nê kaxyw hprõ Ewa nhĩpêx. Hãmri nhũm wa hkra Apewja htõ Kaĩ rom amnhĩ kaxyw Tĩrtũm kôt hamaxpêr tỳx o pa. Jakamã nhũm wa Tĩrtũm mã mẽmoj gõ. Nhũm Apew kot Kaĩ rom Tĩrtũm kãm hprãm xà hkôt kãm mẽmoj nhõr jakamã nhũm amnhĩ tâ omu nê kot amnhĩ to mex xwỳnh ã harê nê kot kãm õr xwỳnh ta nhũm mex ã harê. Tã Apew amnepê m htyk tâ pu htem arĩ harênh mar rãhã ho papa nê kãm pajamaxpêr o:

—Apew na pre hte amnhĩ kaxyw Tĩrtũm kôt hamaxpêr tỳx rãhã ho pa.

Anhỹr ã kãm pajamaxpêr.

⁵ Nê Atãw kanrêhã htãmnhwỳ Enokja na pre haxwỳja amnhĩ kaxyw Tĩrtũm mã hamaxpêr tỳx o pa. Jao hkamnàr rom kãm hprãm xà hkôt pix mã tanhmã kãm amnhĩ nhĩpêx to ho pa nhũm amnhĩ tâ omu nê amnhĩm mex ã harê. Jakamã na pre htyk kêt nê. Na pre Tĩrtũm htĩr rãhã ma amnhĩ wỳr ho api nhũm hkwyjaja tee ri hapêr o pa. Jakamã na pu htem arĩ axpê m mã Enok kot amnhĩ kaxyw Tĩrtũm kôt hamaxpêr mex o pa hã harênh o papa.

⁶ Mē kot amnhĩ kaxyw Tĩrtũm mã mē hamaxpēr kêt xwỳnhjaja na hte Tĩrtũm mē mex ã mē harēnh kêt nē. Tã mē papajaja kêr pu mē Enok pyrà nē amnhĩ kaxyw kãm pajamaxpēr tỳx rãhã ho papa. Nē pajamaxpēr o:

—Tĩrtũmja htĩr rãhã ho rãhã. Koja nhỹrmã mē ixte amnhĩ kaxyw hkôt ijamaxpēr xwỳnhjê ho mex rax nē. Nà koja mē ixto anē.

Anhỹr o mē pajamaxpēr nhũm Tĩrtũm amnhĩ tã mē pajamaxpēr ã mē pahpumu nē mē pahte amnhĩ to mex ã mē pajarē. No mē kot amnhĩ kaxyw kãm hamaxpēr kêt xwỳnhjaja na hte ã mē harēnh anhỹr kêt nē.

⁷ Nē Enok kanrēhã htàmnhwỳ Noehtija na pre haxwỳja amnhĩ kaxyw Tĩrtũm mã hamaxpēr tỳx o pa. Jao hkamnàr rom amnhĩm pàr raxja nhĩpêx. Na pre ra Tĩrtũm na rax kukamã tanhmã kãm ujarēnh to. Kormã aa na wrỳk nhũm Noehti kot omunh kêt tã Tĩrtũm kapēr ma nē mar xà hkôt amnhĩm pàr rax kumrēxta nhĩpêx. Ōrkwỹ kamã hkwỳjê mē mē amnhĩm hipêx. No mē kot Tĩrtũm kapēr mar nē ãm mar xwỳnhjaja na pre Tĩrtũm gô tàm o mē hanhi nē mē himex pa. Nom Noehtija nhũm kot amnhĩ to mex xwỳnh ã harē. Kot amnhĩ kaxyw hkôt hamaxpēr rãhã ho pa jakamã nhũm pre ã mex ã harēnh anē.

⁸ Nē Noehti kanrēhã htàmnhwỳ Apraãwja na pre haxwỳja amnhĩ kaxyw Tĩrtũm mã hamaxpēr tỳx o pa. Na pre Tĩrtũm kot kãm pika nhõr ã kãm amnhĩ jarē nē ra kot ma hwỳr mēnh kaxyw. Hãmri nhũm Apraãw kuma nē hkamnàr rom õ pika kaga nē ma pika hõja wỳr pa. Aa kot ma hwỳr mõr nē omunh

kêt tâ Tirtûm kapêr mar xà hkôt ò pika kaga nê ma hwÿr pa ho pa.

⁹ Hâmri nê hwÿr pôj nê omu nhûm Tirtûm kâm:

—E pika ja kot paj nhÿrmã akanrêhã akra nê atàmnhwÿjê mã kugõ. Anê.

Hâmri nhûm kuma nê pikaja kamã pa ho pa. Ra kamã axtem mē uro hkwyjaja ri pa nhûm Tirtûm kormã mē kator kêt ri nhûm mē ò pika hwÿr pôj nê mē kamã pa ho pa. Nom amnhim òrkwy mex nhîpêx kêt nê. Kormã kêp ò pika kumrêx kêt ã hkamnhix jakamã ãm mry kà o ixkre nhîpêx nê kamã pa ho pa. Nê nhÿhÿm pa kaxyw nê kugrà nê ma amnhî kôt o pa. Amnhî kaxyw Tirtûm mã hamaxpêr rãhã jakamã ã amnhî nhîpêx anhÿr o pa.

Nê Apraãw kra Ijak nê htàmnhwÿ Jakoja wa Apraãw pyrã nê mry kà ho òrkwy nê ma amnhî kôt o pa. Nhûm Tirtûm kot Apraãw mã kapêr pyrã nê wa kãm wa hkanrêhã wa hkra nê wa htàmnhwÿjê mã pika nhôr ã amnhî kukamã wa kãm amnhî jarê.

¹⁰ Jakamã nhûm Apraãw kormã Tirtûm nhô krî hwÿr àpir xa hã amnhî tâ hamãr pê kot ho ò pika mã xwÿnhjê kamã pa ho pa. Kaxkwa hwÿr àpir mã xwÿnhta mex kumrêx. Tirtûm kot hipêx jakamã koja mry kà ho ixkre nhîpêxta rom aa hapêx kêt nê. Jakamã nhûm Apraãw mē pahpyrà nê ma kot hwÿr àpir xa hã amnhî tâ Tirtûm jamãr rãhã ho pa.

¹¹⁻¹² Tã ra hpigêt tÿx nê hkurê hkêt nê pa. Te ra ri htyk kaxyw pa pyrãk. Nhûm hprô Sara haxwÿja hpigêx tÿx nê. Kamrô hkêt ã amgrã xohtô rax kumrêx. Nhûm wa aa hkra hkêt nê pa htã nhûm Tirtûm nhÿrmã wa hkra hã wa kãm awjarê nhûm

wa kuma nê amnhĩ kaxyw hkôt hamaxpêr kurê kumrêx. Nom amnhĩ tã kuma nê tee ri amnhĩ kukamã hamaxpêr hkêt nê. Na pre wa kuma nê axpên mã:

—Nà kot puj xep hãmri tã pahkra. Tĩrtũm kot hã ã pajarênh anhỹr kênã. Anê.

Tã ã wa kot hkra kaxyw Tĩrtũm mã hamaxpêr anhỹr jakamã na pre Apraãwja hprõ htu. Ra wa hamê hpigêt tỳx kumrêx tã nhũm htu. Nhũm wa hkra Ijakja gaa nê wa kãm kato. Jakamã nhũm wa gaa nê rĩ wa hkanrêhã wa htãmnhwỳ xohtô rax o ohtô rax. Ohtô ho kaxkwa kamã kanhêti xohtô jakre. Nê ohtô ho gô xujanãr mỳri pikahti grà hkryre jakre. Jakamã nhũm mẽ tee ri mẽ ho kôta hpar mã. Nhũm Apraãw kêp mẽ hpàr krax.

¹³ Tã nhũm Apraãw nê Ijak nê Jakoja mẽ ri pa tãmtã nê htyk pa nê hapêx. Tĩrtũm kormã kot mẽ kãm pika jarênhhta nhõr xwỳj ri ra htyk pa. Nom kormã mẽ htĩr ri tanhmã kãm hamaxpêr to nê hamaxpêr o:

—Nà kormã Tĩrtũm kot mẽ inhmã pika jarênhja nhõr kêt tã koja nhỹrmã inhmỳr pê ixkanrêhã ixkra nê ixtãmnhwỳjê mã kugõ. Nà koja mẽ kãm kugõ. Ra kot hã inhmã amnhĩ jarênh kênã kot kêt mẽ kãm õr kêt.

Anhỹr o kaxyw kãm hamaxpêr rãhã ho pa. Jao hkĩnh nê hamaxpêr o:

—Nà inhõ krĩja axtem na. Na pa hte jar pika ja kamã ri mẽ hkôt ri ixpa. Te ixpê mẽ uro pyrã nê ri mẽ hkôt ixpa nom jar inhõ krĩ hkêt. Inhõ krĩ na kêt axte mã. Anê.

¹⁴⁻¹⁵ Na prem ã õ krĩ hõ hkukamã hamaxpêr anhỹr o pa. No õ krĩ htũmta mẽ kot hkaga nê pika

hõ hwÿr mõi xwÿnhta na prem ã harënh anhÿr kêt nê. Kop apu mē kot amnhĩm tãm mãn jarënh ronhÿx prem awjanã nê ma akupÿm hwÿr pa. Na prem axtem krĩ hõ jarë nê kormã hwÿr mõi kêt ã amnhĩ jarënh o pa.

¹⁶ Tã nhÿ krĩ na prem ã harënh anê? Nà kaxkwa kamã Tĩrtũm nhõ krĩja. Tãm na mex kumrëx jakamã nhũm prem kormã hwÿr ma àpir xa hã mē pahpyrà nê amnhĩ tã Tĩrtũm jamãr rãhã ho pa nhũm amnhĩ tã mē omu nê hkĩnh nê. Nê mē kot tãm amnhĩ nhĩpêx ã mē omu nê mē kêp hkra hã mē harënh ã hpijaàm kêt nê. Hãmri nê mē kutêp tanhmã õ krĩ ho mex to ho pa.

¹⁷⁻¹⁸ Na pre ra tanhmã Apraãw mã hkra Ijakja jarënh to nê kãm:

—Akra Ijak kanrêhã hkra nê htãmnhwÿjaja koja mē kêp ixkra. Anê.

Tã ra kot amnhĩ tã Apraãw kamã hamak kaxyw hkukamã hamaxpêr nê hamaxpêr o:

—Xà we Apraãw kãm ixkĩnh tÿx kumrëx nê kãm ixkõt amnhĩ nhĩpêx rãhã ho pa hprãm nà? Xà we kãm ixkĩnh tÿx o hkrata jakrenh? E pa kop we ja hã amnhĩ tã kamã ama nê omu mãn. Anê.

Hãmri nê kot hkra hpĩr nê kãm õr ã kãm karõ. Hãmri nhũm kuma nê ra kot kãm hpĩr kaxyw. Kot Tĩrtũm kot amnhĩ nhĩpêx ã omunh mex jakamã hkamnàr rom kot kãm hpĩr kaxyw.

¹⁹ Nê hamaxpêr o:

—Nà Tĩrtũm akupÿm kot mē ho htĩr xwÿnh kênã.

Anhÿr jakamã kãm hkra hpĩr puma hkêt nê ra kot kãm hpĩr mã tã nhũm Tĩrtũm amnhĩ tã omu nê nê kãm kapêr nhũm kuma nê hpĩr kêt nê wa ma akupÿm õrkwÿ hwÿr mõi. Tã ã kot hkra nhĩpêx

anhÿr jakamã Apraãw mã te Ijak htyk nê akupÿm htÿr pyrãk.

²⁰ Nê Ijakja na pre haxwÿja amnhÿ kaxyw Tÿrtÿm mã hamaxpêr tÿx o pa. Jao hkamnàr rom amnhÿ kra wa kãm Tÿrtÿm kot wa ho mex kukamã wa kãm harê. Kra Jako mẽ Ejauta wa kãm harê nê wa kãm:

—E koja nhÿrmã Tÿrtÿm inhmÿr pê war ato mex rãhã ho pa. Anê.

²¹ Nê Jakoja na pre haxwÿja amnhÿ kaxyw Tÿrtÿm mã hamaxpêr tÿx o pa. Jao hkamnàr rom hkra Juje mã Tÿrtÿm kot mẽ ho mex kukamã harê. Na pre Jakoja hkra nê htãmnhwÿ mẽ hpimràatã hprãm xà ma Ejit wÿr pa nê kamã pa ho pa. Tã nhÿm Jako hpigêt tÿx nê ra htyk kaxyw. Hãmri nê hkra Juje mẽ hkra wa mẽ kãm kapêr nê mẽ kãm:

—E na pa tee amnhÿ kamã ama. Na pa ra ixtyk kaxyw. Nom koja Tÿrtÿm nhÿrmã inhmÿr pê mẽ ato mex rax nê. Anê.

Hãmri nê amnhÿ kaxpar xà hã pÿ hã amnhÿ kaxpa nê kãnhmã xa nê Tÿrtÿm mã mex o mex ã harê. Hãmri nê akupÿm nôr xà kamã nõn ty.

²² Nê Jujeja na pre haxwÿja amnhÿ kaxyw Tÿrtÿm mã hamaxpêr tÿx o pa. Jao htyk kaxyw nê hkamnàr rom hkwÿjê mã tanhmã amnhÿ jarênh to. Ra hpigêt nê htyk kaxyw nê hkwÿjê mã tanhmã amnhÿ tã karõ hto nê mẽ kãm:

—E na pa ra ixtyk kaxyw. Tã koja Tÿrtÿm inhmÿr pê nhÿrmã Ejit rÿm mẽ akator nê ma akupÿm mẽ panhõ pika hwÿr mẽ ato pa. Ra kot mẽ panhÿgêt Apraãw mã amnhÿ jarênh xà hkôt. Jakamã kwa mẽ inhma. Kêr ka mẽ akupÿm anojarêt nê ma amnhÿ kôt ixtã kasãwja mÿ nê amnhÿ kôt ixto mõ. Hãmri

nē mūtar mē panhō pika kamā mē anhō krī htā ijaxà pa jawy mē akuri ixtā pyka. Anē.

²³ Nē Mojes katorxà mē hipêêxàja na pre wa haxwýja jajê pyrà nē amnhī kaxyw Tīrtūm mā hamaxpēr tỳx o pa. Juje hkanrēhā htāmnhwý na pre wa. Jakamā nhūm Ejit nhō pahija tee ri Ijaew xohtō rax kumrēx ā mē omu nhūm ja kēp omnuj nē. Hāmri nhūm mē hkra myjaja mē hapôx kôt mē hamýnh xwýnhjaja kot mē hpar ā mē kām karō. Tā nhūm Mojes kato nhūm hipêêxà mē katorxàja wa omu nhūm muxre nhūm wa tee ri hkukamā hamaxpēr. Hāmri nē pahi Paraohiti mā mē hkra jamýnh xwýnh kot wa kēp hpīr pymaj ho pimxur o hā mytwrý axkrunēpxi. Tīrtūm kamnàr rom wa amnhī tā kām uma hkēt nē ā kēp hkra ho hpimxur anē.

²⁴ Nē Mojes na pre haxwýja amnhī kaxyw Tīrtūm mā hamaxpēr tỳx o pa. Kormā karàre ri na pre Paraohiti hkra nija omu nē amnhīm kumý nē ho hkra nē amnhī kôt o pa. Rāhā nhūm àptàr nhūm Ejit nhō xwýnhjaja kēp pahi Paraohiti htāmnhwý hā axpēn mā harē. Hāmri nhūm tee ri amnhī tā mē kuma nē amnhī tā mē kām aprā nē mē kām:

—Kwa mē ā ijarēnh anhýr kēt nē. Ixpē mē akwý hkēt. Anē.

²⁵ ām kām Tīrtūm kwýjê kôt pix mā ri pa ho pa hprām. Nē kām Ejit nhō pahi hkôt amnhī tomnuj prām kēt nē. Ām mē kot amnhī tomnuj pix o paja na mē kām hprām nhūm ja hā mē omu nē tee ri mē hkukamā hamaxpēr nē hamaxpēr o:

—Nà kot paj mē hkôt ri ixpa hkēt kumrēx. Mē hkīnh nē pa htā koja mē gaa nē ty nhūm mē hkīnhja mē kēp hapêx. Nà kot paj Tīrtūm kwýjê hkôt mǎn ri

ixpa ho ixpa. Mě kot Tirtũm ã mẽ inhĩpêx kati htã pa arĩ mẽ hkôt ixpa ho ixpa.

²⁶ Inhmã Ejit nhõ xwýnhjê hkôt ixkukrêx rax nê ri ixpa hprãm kêt. Kwār mẽ māmri Tirtũm ã tanhmã inhĩpêx to. Koja mẽ ã inhĩpêx anê pa ixpunuj nê ri ixpa htã koja Tirtũm nhỹrmã ixto mex rax nê. Nà kot paj Ejit nhõ pahihtu hkôt ri ixpa hkêt nê.

Anhỹr jao ra mẽ pahpyrà nê Kris gryk ã mẽ hkaga.

²⁷ Tã akupỹm mẽõ pika hwýr Ijaewjê ho mõr kaxyw nhũm Ejit nhõ pahihtija tee ri ja hã omu nê kamã gryk tỳx nê. No nhũm Mojesja amnhĩ kaxyw Tirtũm kôt hamaxpêr tỳx o hkamnàr rom kãm mẽ uma hkêt nê. Nê mẽ kêp hkwýjê kator pa nê ma akupỹm mẽõ pika hwýr amnhĩ kôt mẽ o pa. Tirtũm kamnàr rom ã mẽ kêp mẽ ho kator anê. Aa kot no ho omunh kêt tã amnhĩ kaxyw kãm hamaxpêr tỳx nê hkamnàr rom mẽ kator nê hamakêtkati nê mẽ o pa.

²⁸ Nê hkamnàr rom mẽ hkĩnh ã arĩgro mẽ kot kãm “Pas” anhỹr xwýnhta ho hkrax. Kormã Ejit rũm kator kêt ri. Nê kaxyw amnhĩ kwýjê mã hã karõ nê mẽ kãm:

—E pa mẽ amã Tirtũm kapêr jarê ka mẽ inhma. Nà kot puj xep mẽ jarãhã ôwêhti hkwý pa nê hkamrô ru. Nê hkamrô ho panhõrkwý jakwakre hã pĩ kukõ. Hãmri nê ĩ kuxôt nê kuku. Koja kamàt nhũm mẽ kot amnhĩ tomnuj xwýnhjê pê mẽ hkra my kot wa piitã mẽ hpar mã xwýnhja mō. Hãmri nê mẽ pamý ri mō nê ã mẽ pahte mẽ panhõrkwý nhĩpêx anhỹrja ã omu nê tanhmã mẽ pahkrajê ho hkêt nê. Tirtũmja ã mẽ pahte amnhĩ

nhîpêx anhÿr kaxyw ã inhmã karõ anê. Jakamã e pu mẽ hkamnàr rom ã amnhĩ nhîpêx anê kê mẽ pahkrajaja mẽ pahpê htyk kêt nê. Anê.

Hãmri nê ã mẽ kot Ejit rûm kator xà hã arĩgrota ã mẽ hkĩnh o kator krax anê. Mẽ hkĩnhja na htem kãm “Pas” anê.

²⁹ Nê Ijaewjaja na prem haxwÿja Ejit rûm kormã Mojes kôt mẽ pa ri uràk nê amnhĩ kaxyw Tĩrtũm mã hamaxpêr. Jakamã na prem ra gô xujanãr pê “Gô Kamrêk” anhÿr xwÿnhja mÿ ri kuhê nhũm Tĩrtũm mẽ kãm ho axkjê. Nê mẽ kãm hkôt ã ho amgrà nhũm mẽ hã hkamnàr rom mex nê rêr pa. No nhũm mẽ hkôt mẽ kot mẽ himex kaxyw mẽ mrar xwÿnhjaja. Ejit nhõ pôristijaja nhũm gôja akupÿm mẽ hã axkamur nê mẽ himex pa.

³⁰⁻³¹ Nê Ijaew kot Mojes mÿr pê Jojue hkôt pa ri mẽ uràk nê amnhĩ kaxyw Tĩrtũm kôt hamaxpêr o pa. Na prem ra Tĩrtũm kot mẽ kãm pika nhõr xwÿnhhta wÿr pøj nhũm Tĩrtũm krĩ pê Jeriko hwÿr mẽ kurê. Mẽ kot kamã mẽ pa xwÿnh pê utàr kaxyw mẽ hwÿr mẽ kurê. Mẽõ krĩ pu hã kahêja kên tÿx pix o na pre. Nê hprêk rax kumrêx. Nê krĩ nhõ xwÿnhjaja kãm Tĩrtũm kapêr mar prãm kêt. Hãmri nhũm Tĩrtũm mẽ hã Ijaewjê mã amÿnê nê mẽ kãm:

—E mẽõ krĩja kot paj mẽ amã kugõ nom kêr ka mẽ inhmar kumrêx. Kêr ka mẽ apkati mẽ mẽ õ krĩ hwÿr mra nê kupu hpÿnh o atã apkati kêp 7 nê rĩ ma akupÿm mra. Anê.

Hãmri nhũm mẽ kuma nê mar xà hkôt ma Jeriko hwÿr mra. Hãmri nê hwÿr pøj nê Tĩrtũm kamnàr rom krĩ puhã kahêja kupu hpÿnh o hã apkati kêp 7. Hãmri nhũm apkati pê 7ta ã nhũm kên tÿx o kahêja mẽ kêp amnhĩ krakrak nê rôrôk pa. Nhũm

mê mra nê hkôt krî hwÿr agjê nê krî nhõ xwÿnhjê nhîmex pa. Nom krî kamã kuprÿ pê Raapja Ijaew pyrã nê amnhî kaxyw Tirtûm mã hamaxpêr o pa jakamã nhûm mê kormã mê himex kaxyw mê hwÿr môr kêt ri amnhî kukamã mê hkwÿjaja kot mê hã ukapi ho pa kaxyw mê hwÿr mê kurê. Hãmri nhûm Raapja mê kêp amnhî pyrã nê Tirtûm kôt hamaxpêr ã mê omu nê hkwÿ kot mê himex pymaj amnhî nhõrkwÿ kamã mê kêp mê ho amÿxu nhûm mê hkà hkînh pê ma akupÿm hkwÿjê wÿr mō. Jakamã nhûm mê kot mê himex kaxyw mê hwÿr mra hãmri nê amnhî pyrã nê tanhmã Raap mê õ fãmii ho hkêt nhûm mê arî htîr nê pa. Mê urak nê amnhî kaxyw Tirtûm kôt hamaxpêr o pa hã omunh xà hkôt tanhmã mê ho hkêt nê.

³² ã na pre mê kot amnhî kaxyw Tirtûm kôt mê hamaxpêr xwÿnhjaja Tirtûm kamnâr rom amnhî nhîpêx anhÿr o pa. Nom jajê pixjaja na prem ã amnhî nhîpêx anhÿr hkêt nê. Mãânên Giteãw nê Parak nê Sãsõ nê Jepte nê Tawi nê Sãmuew nê Tirtûm nhÿ hã mê kapêr o pa xwÿnhjaja. Jajê piitã na prem wamtajê pyrã nê amnhî kaxyw Tirtûm kôt hamaxpêr tÿx rãhã ho pa. Nom kot paj ixprî hã tanhmã mê kot hkamnâr rom amnhî nhîpêx to hã mê harênh kêt nê. Kot pa anê nê tokyx harênh par kêt nê. Mê ohtô rax kumrêx jakamã na pa ãm hkwÿ pix jarê nê hã kagà.

³³ Na prem hkwÿjaja Tirtûm kamnâr rom ma mê kot amnhî tomnuj xwÿnhjê nhõ krî hwÿr mra nê mê kêp mê õ pika pytà. Nê mê hkwÿjaja Tirtûm kamnâr rom mê ho amnhîptâr mex o pa. Nhûm prem kãm Tirtûm kurê xwÿnhjaja mê hkwÿjê pynê nê ahkrehti kamã mry xoprê hkwÿ nhîpy mê kurê.

Nhũm prem amnhĩ tã mẽ omu nẽ amnhĩ kaxyw Tĩrtũm mã hamaxpěr kurê kumrẽx nhũm amnhĩ tã mẽ omu mẽ nê te mry jakwa ho pikamỳr tỳx pyràk o mẽ hipêx nhũm ãm mẽ omunh o kuhê nẽ tanhmã mẽ ho hkêt nẽ. ã na prem Tĩrtũm kamnàr rom amnhĩ nhĩpêx anhỳr o pa.

³⁴ Nhũm mẽ kot kuwy rax kãm mẽ hkwyjê rẽnh tã nhũm mẽ kot amnhĩ kaxyw Tĩrtũm mã hamaxpěr tỳx nhũm amnhĩ tã mẽ omu nẽ mẽ nê tanhmã kuwy ho nhũm mẽ hxêt kêt nẽ. Nhũm pre mẽ hkwyjaja wapo ho mẽ hkamnhwỳr o mẽ hkwyjê hpar kaxyw nhũm mẽ amnhĩ kaxyw Tĩrtũm mã hamaxpěr nhũm amnhĩ tã mẽ omu nẽ mẽ nê tanhmã mẽ ho nhũm mẽ amnhĩ rê nẽ mẽ umaj hprõt nẽ ma mra. Mẽ hihtỳx kêt tã Tĩrtũm kamnàr rom ỳ hã hihtỳx nẽ mẽ kãm mẽ hkurê xwỳnhjê ho krihkrit pa nhũm mẽ ma akupỹm hapêx.

³⁵ Nẽ mẽni hkwyjaja na prem haxwỳja amnhĩ kaxyw Tĩrtũm mã hamaxpěr tỳx o pa. Jao mẽ hkra-jaja mẽ kêp htyk tã nhũm prem Tĩrtũm kamnàr rom mẽ ho kuwy nhũm mẽ kuma nẽ akupỹm mẽ kãm mẽ ho htĩr.

ã na prem amnhĩ kaxyw Tĩrtũm mã hamaxpěr pê mex nẽ pa anẽ. No na pre mẽ hkwyjaja mẽ uràk nẽ amnhĩ kaxyw kãm hamaxpěr tỳx tã nhũm Tĩrtũm tokyx mẽ ho mex kêt nẽ. Na pre mẽ kãm mẽ hkurê xwỳnhjaja Tĩrtũm ã mẽ par kaxyw. Nẽ mẽ hkwyjaja Tĩrtũm ã mẽ hipêx kati ho pa nhũm mẽ amnhĩ xà htỳx kãm hamak kãm ty. Nhũm mẽ himex kaxyw nẽ mẽ kãm:

–Kwa mẽ Tĩrtũm kaga. Kot kaj mẽ hkaga pa mẽ amã inhũre nẽ mẽ anhĩmex kêt nẽ. Anẽ.

No nhũm mẽ kuma nẽ ãm mẽ kuma nẽ amnhĩ kaxyw kãm hamaxpêr tỳx pẽ mẽ kãm:

—Nà mẽ kam nẽ mãmrī ixpĩ. Inhmã ixtyk pyma hkêt. Kot paj ty nhũm Tĩrtũm akupỹm ixtõ ixtĩr pa kuri inhmex kumrêx nẽ ri ixtĩr tũm nẽ ixpa ho ixpa.

Anhỹr o mẽ kãm amnhĩ jarênh jakamã hãmri Tĩrtũm kaga hkêt rãhã nhũm mẽ himex.

³⁶ Nẽ mẽ kãm mẽ hkurê xwỳnhjaja na prem Kris ã mẽ hkwỳjê mã hpêr o pikênh pẽ mẽ htak xà ho mẽ htak rũnh o pa. Nẽ kãx o mẽ hkwỳjê hpa hpre nẽ mẽ hte hpre nhũm mẽ kêp prês nẽ hkrĩ ho hkrĩ.

³⁷⁻³⁸ Nhũm prem kên rũnh o mẽ hkwỳjê htak o mẽ kupa. Nẽ mẽ hayr o mẽ hkwỳjê pa. Nẽ mẽ hkamnhwỳr o mẽ hkwỳjê pa. ã na prem Kris kôt mẽ hamaxpêr ã mẽ omunh xà hkôt mẽ hipêx anhỹr o pa. Jakamã na pre mẽ hkwỳjaja mẽ umaj mẽõ krĩ rũm hapôj nẽ ma hprôt nẽ mra. Nẽ te mẽ õ krĩ hkêt pyrà nẽ kapôt ã kêp amrakati nẽ ri pa. Mẽ ê hkêt nẽ ôwêhti hkà ho ê nẽ ri hã pa. Nẽ motre kà ho amnhĩ pre nẽ ri hã pa. Nẽ kên prêk ã api nẽ kre kamã hpimxur o pa. Nẽ pika hkre kamã hpimxur o pa. Nhũm mẽ kãm mẽ hkurê xwỳnhjaja te mẽ kêp ahpunu nẽ mẽ kêp ahkro pyràk o mẽ hipêx nẽ axpên mã mẽ harênh o:

—Nà mẽ mexti hã. Kwa pu mẽ piitã mẽ himex paa ri.

Anhỹr o mẽ harênh tã nhũm Tĩrtũm mẽ uràk nẽ ã mẽ harênh anhỹr kêt nẽ. Na pre mẽ mex kumrêx ã mẽ harê. Nẽ nhỹrmã kuri mẽ mex nẽ pa ho pa hkukamã mẽ harê.

³⁹ ã na prem Tĩrtũm kamnàr rom mẽ kãm mẽ hkurê xwỳnhjê kutã amnhĩ to htỳx kãm htyk o

pa anê. Nhũm Tĩrtũm ja hã mẽ omu nê hkĩnh nê kãm mẽ hapê htỳx nê. No nhũm mẽ kormã htĩr ri amnhĩm Tĩrtũm kot mẽ ho mex xà jamỳnh kêt rãhã ty.

⁴⁰ Tã mo na pre Tĩrtũm kormã mẽ htĩr ri hkwỳjê pyrà nê mẽ ho mex kêt nê? Nà na pre kormã mẽ hkukamã hamaxpêr o:

—Nà kot paj kormã mẽ ho mex kêt nê. Kot pa mẽ mỳr pê mẽ kot ixkôt amnhĩ xunhwỳr mã xwỳnhjê jamãr grire mãn. Kêr pa inhõ krĩ kamã mẽ ho ixpimràatã mẽ ho mex rax kumrêx. Nà kot paj ã mẽ ho mex anê. Ja na kêt inhmã mex o kormã mẽ htĩr ri ixte mẽ ho mexta jakrenh. Anê.

Jao ra ã mẽ papajaja mẽ pakukamã hamaxpêr anê.

12

Mẽ pahte Jejus pyrà nê mẽmoj kutã amnhĩ to htỳx ã mẽ pamã karõ

Pĩripõs 3.12-21

¹ Na pre mẽ pakukamã mẽ panhĩgêt kwỳjaja amnhĩ kaxyw Tĩrtũm mã hamaxpêr pê ã amnhĩ xà htỳx kamã hamak o pa anê. Tã te ra mẽ kot kỳj rũm kaxkwa rũm mẽ pahpumunh nê tanhmã mẽ pamã kapêr to pyrà nê mẽ pamã kapêr o:

—E mẽ inhma mẽ ixkanrêhã mẽ ixtàmnhwỳjaja. Na pa prem ã Tĩrtũm kamnàr rom amnhĩ nhĩpêx o ixpa anê. Mẽ kot ja hã mẽ inhĩpêx kati htã pa prem Jejus kaga hkêt nê. Tã kêr ka mẽ ixpyrà nê ã mẽ kãm mẽ akurê xwỳnhjê kutã amnhĩ to htỳx anê. Nê mẽ ixpyrà nê amnhĩ kaxyw Tĩrtũm kôt pix mã ajamaxpêr tỳx rãhã ho ri apa. Anê.

Jakamã kwa kêr pu mẽ uràk nê ã amnhĩ nhĩpêx anhÿr rãhã ho mãn ri papa. Te mẽ hprôt xwÿnhjaja kot amnhĩ nhĩpêx pyràk o amnhĩ nhĩpêx. Na htem hprôt tÿx kaxyw mẽmoj pytĩ jamÿnh nê ho hprôt hkêt nê. Na htem ÿ kamã hprôt o hprôt tÿx nê wam hkwÿjê mã wa nê mra. Ja pyrã nê kêr pu mẽ pahte Tĩrtũm kapêr kôt amnhĩ nhĩpêx mex o papa kaxyw tanhmã mẽ pahte amnhĩ tomnuj to hã amnhĩ pumu nê hkaga kurê kumrêx. Mẽ pahte amnhĩ tomnuj o papa xàja te mex pyràk no ãm mex kêt. Te ho mẽ hprôt xwÿnh kot axtem nê mẽmoj pytĩ mÿnh nê tee ri ho hprôt tÿxta pyràk. Kot puj mẽ tanhmã amnhĩ tomnuj to ho papa nê Tĩrtũm kapêr kôt amnhĩ nhĩpêx mex kêt nê. Jakamã kwa kêr pu mẽ Tĩrtũm kapêr gryk ã amnhĩ tomnuj nê amnhĩ to htÿx rãhã ho papa. Te ho mẽ hprôt nê nhÿri mẽ àhuk xà pix kukamã hamaxpêr rãhã hprôt tÿx xwÿnhhta pyrã nê ãm Jejus mã pajamaxpêr tÿx rãhã ho papa.

² E kot paj mẽ amã Jejus kot tanhmã mẽ panê amnhĩ nhĩpêx toja jarê ka mẽ inhma. Nà kot mẽ panê mẽ pahte amnhĩ tomnuj pãnhã amnhĩrer kaxyw htyk nhũm mẽ pahte hkôt amnhĩ xunhwÿr jakamã na hte mẽ pamã pajamaxpêr nyw gõ pu mẽ amnhĩ kaxyw hkôt pajamaxpêr ho ri papa. Na pre mẽ kãm hkurê xwÿnhjaja kot pĩ kahpa hã nhôr nê hpĩr mã nhũm mẽ kutã mẽ kãm amnhĩ to htÿx nê arĩ mẽ kãm xa nhũm prem kupĩ. Tã tee ri amnhĩ kukamã hamaxpêr o Tĩrtũm kaga hkêt nê. Na pre hamaxpêr o:

—Nà kwãr mẽ mãmrĩ ixpĩ. Kot paj ty nhũm Inhĩpêxà akupÿm ixto ixtĩr pa kuri inhmex kumrêx nê ixtĩr tũm nê ixpa ho ixpa. Anê.

Tã na ra kaxkwa kamã Tĩrtũm xupôk rũm mex nê hkrĩ ho hkrĩ.

³ Jakamã kwa kêr pu mẽ kot ã mẽ panê amnhĩ nhĩpêx anhỹrja mã pajamaxpêr rãhã ho ri papa. Mẽ kot hipêx kati htã nhũm mẽ kutã amnhĩ to htỳx nê xa. Tã kêr pu mẽ uràk nê mẽ kãm mẽ pahkurê xwỳnhjê kutã amnhĩ to htỳx rãhã ri papa. Jao tee ri amnhĩ kukamã pajamaxpêr o mẽ umaj Tĩrtũm kaga hkêt nê.

⁴ Na ka htem ma mẽ kot amnhĩ tomnuj xwỳnhjê hwỳr mra nê mẽ kot amnhĩ tomnuj kaga kaxyw tanhmã mẽ kãm akapêr to nhũm mẽ ja hã mẽ ama nhũm ja mẽ kêp omnuj nhũm mẽ amnhĩ tã tanhmã mẽ atomnuj to. Nom wam mẽ kot mẽ pahkwỳjê nhĩpêxta pyrã nê kormã mẽ atõxpĩr kêt nê.

*Tĩrtũm kot tanhmã hkrajê nhĩpêx to hã harênh
Juãw 15.1-2; Eprêw 5.7-8; Xiakre 1.2-4*

⁵ Nê mãn ka mẽ arĩ Tĩrtũm kapêr ã kaga htũm kwỳ hã ano htỳx japêr. Mẽ pahpê Tĩrtũm krajê mã kapêr jarênh kot:

Koja Pahi Maati tanhmã mẽ ate amnhĩ tomnuj to nê mẽ amã kapêr ka mẽ ama nê mar tỳx nê mẽmojta kaga kurê kumrêx. No mẽ ama nê tee ri kot nê akurê xwỳnhhta kukamã ajamaxpêr o ri akaprĩ o axtem nê Tĩrtũm kaga hkêt nê. Ama nê kot amã mẽmoj nê kapêr xwỳnhhta kaga kurê kumrêx.

⁶ Na hte Tĩrtũm kãm mẽ pajapê hã tanhmã mẽ pahte amnhĩ tomnuj to hã mẽ pahpumu nê hã tanhmã mẽ panhĩpêx to. Tãm mẽ pahte amnhĩ nhĩpêx o papa kaxyw. Kot mẽ pahpê hkra hã mẽ pajarênh jakamã na hte ã mẽ

pahte tãm amnhĩ nhĩpêx o papa kaxyw mẽ panhĩpêx anê. Anê.

⁷ Jakamã kot kaj mẽ tanhmã amnhĩ tomnuj toja mýrapê tanhmã apunuj kute nê ri apa htã no âm tee ri amnhĩ kukamã ajamaxpêr hkêt nê. Kêt mẽ âm ajamaxpêr o:

—Nà ixte tãm amnhĩ nhĩpêx kaxyw na Tĩrtũm ã inhĩpêx anê. Ixpê hkra hã ixte amnhĩ to mex o ixpa prãm xaj ã inhĩpêx anê.

Anhỹr o mãn kêt ajamaxpêr. Na hte mẽ hipêêxà mẽ hkra kot amnhĩ to mex kaxyw ã mẽ hipêx anê. Tã Tĩrtũm na hte mẽ urak nê ã mẽ panhĩpêx anê.

⁸ No koja mēhō hkra kot tanhmã amnhĩ tomnuj to hã omu nê âm omu nê hã tanhmã ho hkêt nê. Hã koja hkraja te hipêêxà hkêt nê hã awrãre nê ri pa pyrak. Tã mẽ pahpê Tĩrtũm krajaja kot puj mẽ tanhmã amnhĩ tomnuj to nhũm ja hã mẽ pahpumu nê hã tanhmã mẽ pahto. Nom mẽ kêp hkra hkêt xwýnhjaja nhũm hte ja hã mẽ omu nê âm hã mẽ omu nê hã kormã tanhmã mẽ hipêx to hkêt nê.

⁹ Nê na hte mẽ panhĩpêêxà mẽmoj tã mẽ pamã karõ pu htem kuma nê hkôt amnhĩ nhĩpêx. Ja mex. Nom kaxkwa kamã Mēpahpãm maatija mẽ pahte mar nê hkôt amnhĩ nhĩpêxja na kêt mex kumrêx. Kot puj mẽ ã amnhĩ nhĩpêx anê nê nhỹrmã kuri pamex nê pahtĩr tũm nê papa ho papa.

¹⁰ Nê mẽhprĩre na htem hamaakro nhũm mẽ hipêêxà tanhmã hã mẽ ho. Hã mẽ hkaprêprêk rý hã mẽ kãm akir. Amnhĩ krã hkôt tanhmã mẽ hipêx to. Mẽ kot ja hã amnhĩ pumunh nê axte hkêt kaxyw. Ja mex. Tã mẽ papajaja. Mẽ pahpê Tĩrtũm kra na pu htem tōhã tanhmã amnhĩ tomnuj to

nhũm mẽ pahpumu nẽ tanhmã hã mẽ pahto. Mẽ pahte amnhĩ pumunh nẽ axte hkêt kaxyw. Uràk nẽ amnhĩ to mex pix o papa kaxyw.

¹¹ Na hte mẽmoj tâ tanhmã mẽ panhĩpêx to pu mẽ tee ri amnhĩ pumu nẽ pahkaprĩ nẽ pahkĩnh kêt nẽ ri papa. Nom kot puj mẽ tokyx tanhmã amnhĩ tomnuj tota kaga nẽ akupỹm Tĩrtũm kôt tãm amnhĩ nhĩpêx o papa nẽ akupỹm pahkĩnh nẽ pajamakêtkati nẽ ri papa.

Mẽ pahte Tĩrtũm kaga hkêt ã mẽ pamã karõ

¹² Jakamã e kwa kêr ka mẽ amnhĩ to htỳx nẽ apa. Mẽ kot Kris ã tanhmã mẽ anhĩpêx to htãã. ãm Tĩrtũm kôt pix mã amnhĩ nhĩpêx mex pê akĩnh nẽ apa.

¹³ Kêr kê Kris kôt atõjê hõ tee ri mẽmoj tâ amnhĩ pumunh kôt ra Tĩrtũm kaga kaxyw tâ ã mẽ ate amnhĩ nhĩpêx anhỹr ã mẽ apumu nẽ mẽ apyrà nẽ akupỹm hkôt amnhĩ xãm tỳx nẽ hkaga hkêt nẽ.

¹⁴ Nẽ kêr ka mẽ tãm ri axpên nhĩpêx o ri apa. Jao axpên kôt ajamakêtkati nẽ ri apa nẽ amnhĩ to mex pix kukamã ajamxpêr. No kot kaj mẽ anhỹr kêt nẽ nhỹrmã mẽ panhõ Pahi Maati hwỳr axàpir nẽ kuri amex nẽ apa hkêt nẽ.

¹⁵ Na hte Tĩrtũm mẽ pahto mex nẽ mẽmoj to mẽ pakutã nojarêt rãhã o pa. Jakamã kwa kêr ka mẽ hkaga hkêt nẽ. Nẽ tanhmã ri ajamxpêr punuj to ho ri apa hkêt nẽ. Kot ka mẽ ã amnhĩ nhĩpêx anẽ nhũm Kris kôt mẽ pahkwỳjaja ja hã mẽ apumu nẽ mẽ apyrà nẽ tanhmã amnhĩ tomnuj.

¹⁶ Nẽ kêr ka mẽ axpên kãm apijaàm kêt o ri apa hkêt nẽ. Nẽ te finat Ejaui kot amnhĩ nhĩpêx pyràk o ri apa hkêt nẽ. Na pre Tĩrtũm ã hpijaàm kêt

nê hkwyjê kamã hpijaàm kêt o pa. Nê Tĩrtũm mã hamaxpêr kêt kumrêx. Kêp Ijak kra kot wa jakamã koja nhÿrmã hipêêxà mÿr pê kêp hikukrêx nê õ pika piitã ho àrĩk pa. Hãmri nhũm hipêêxà kot ho Tĩrtũm wÿr nhũm kot ho mex kaxyw mã tã nhũm axtem nê mẽmo arĩgro hã kãm prãm xàj kot kêp mẽmoj to àrĩk mã xwÿnhnta htõ Jako mã hkaga hpa. Mankwÿrtre gôj kãm ãm prãm xàj kãm hkaga hpa. Jakamã nhũm Jako hpãnhã te kêp Ijak kra kot wa pyrà nê mÿr pê õ mẽmoj piitã ho àrĩk mã.

¹⁷ Gaa nhũm Ejau tee ri ã amnhĩ nhĩpêx anhÿrja mã hamaxpêr o hkaprĩ nê. Nê tee ri kãm Jako kot akupÿm kãm mẽmojta nhõr prãm kaprÿ. Nê mur nê hã hipêêxà wÿ no nhũm axte kãm mẽmoj nhõr kêt nê. Nhũm kot ho Tĩrtũm wÿr kaxyw tee ri amnhĩ to kuwÿ no nhũm kuma nê ãm kuma nê kãm ho anhÿr kêt nê.

¹⁸ Nê amnepê mã Tĩrtũm kot mẽ panhĩgêxjê mã kapêr kaxyw na prem hixêt prêk pê Sinai jarênhja wÿr akuprõ nê hparpê kuhê. Hãmri nhũm hixêt nhĩmõk ã kuwy hpõk rax kumrêx. Nê kuwy mÿr ri kakrã htyk ajêt. Nê kôk àpêr tÿx nê. Nhũm Ijaewjaja hixêt krax ã omu nê kãm maa ho htertet o kuhê.

¹⁹⁻²¹ Hãmri nhũm mẽhõ pifti kakô nhũm Tĩrtũm hixêt nê mẽ kãm kapêr nê mẽ kãm:

—E mẽ inhma. Kêr ka mẽ hixêt ã axàpir kêt nê. Kot kaj mẽ atõ hã api rÿ mẽ akrit õ hã api ka mẽ ja hã omu nê kaxyw kên rũnh kwÿ jamÿ nê ho htak o apĩ. Anê.

Hãmri nhũm mẽ piitã tee ri kuma nê kãm ma htÿx kumrêx nê amnhĩ nê kãm:

—Kwa hāmri Tīrtūm. Axte mẽ inhmã mẽmoj jarēnh kêt nē. Mojes pix mã mǎn mẽ ixkaxyw tanhmã kām akapēr to. Anē.

Jakamã nhūm Mojes Tīrtūm mã amnhĩ jarēnh nē kapēr mar kaxyw hixêtja ā api. Kām ma nē htertet rāhã mō nē hã api.

²² Nom mẽ kām ma ho Tīrtūm mã amnhĩ jarēnh tã mẽ papajaja na pu htem mẽ kurom paxàmnhĩx kām amnhĩ jarēnh o papa. Na pu htem kām amnhĩ jarēnh kaxyw nē hixêt prék ā paxàpir kêt nē. Te ra mẽ pahte ma kaxkwa hwỳr ò krĩ hwỳr paxàpir nē pano ho omunh pê kām amnhĩ jarēnh pyrək. Ò krĩa mex o mex. Kamã kapēr o mẽ wrỳk xwỳnhjaja ohtô o ohtô. Na htem kamã hkĩnh rāhã ho pa ho pa.

²³ Nē ò krĩ hwỳr na hte hkra xàpir xwỳnhjaja ri pa. Nē mẽ papajaja na pu htem kām amnhĩ jarēnh kaxyw nē te kaxkwa kamã kuri pakuhê nē kām amnhĩ jarēnh pyrək o amnhĩ nhĩpêx. Te mẽ pahpê hkra kot wa pyrək jakamã mẽ pamã uma hkêt. Nhūm pre Tīrtūm ra ò kagà kamã mẽ pakutêp amnhĩm mẽ panhĩxi hã kagà hpa. Na hte mẽmoj piitã hamār o hkrĩ. Nē krĩa kamã amnepêm kormã Kris kot mẽ pahwỳr wrỳk kêt ri nhūm ra amnhĩ kaxyw Tīrtūm kôt hamaxpēr mex xwỳnhjaja haxwỳja ra kamã ri pa. Ra Tīrtūm kot mẽ ho hkra jakamã nhūm mẽ kuri ri pa ho pa.

²⁴ Nē Jejus haxwỳja kamã pa ho pa. Na pre mẽ panê htyk nē hkamrô pikapĩrja o mẽ pahte amnhĩ tomnuj pānhã amnhĩre. Jakamã na pu htem hkôt amnhĩ xunhwỳ nhūm mẽ pahto hkra pu mẽ paxàmnhĩx ri Tīrtūm mã amnhĩ jarēnh nē amnhĩ to hwỳr o papa.

Amnepê m na pre Tirtûm tee ri Kaî kot htõ Apew pîr nê hkamrô pikapîrja ã omu nê hamaxpêr o:

—Nà ã kot amnhî nhîpêx anhÿr jakamã kot paj hã homnuj tÿx nê. Anê.

Tã ra hpãnhã Jejus kot mē panê htyk nê hkamrô pikapîrja ã omu nê ra axtem hamaxpêr o:

—Nà ãm hãmri na Ixkraja mē nê ty. Jakamã mē kot hkôt amnhî xunhwÿr xwÿnhjaja kot pa Ixkra kukwak ri mē kot amnhî tomnuj mÿrapê tanhmã mē ho hkêt nê.

Anhÿr o mē pakukamã hamaxpêr. Æ hamaxpêr anhÿrja mex o mex.

²⁵ Na pre Mojes Tirtûm nhÿ hã mē panhîgêxjê mã xatã mē kãm Tirtûm kapêr jarênh o ri pa nhûm mē kuma nê hkôt amnhî nhîpêx o pa. Tã gaa nê ra hã nohkêt pa nê akupÿm mē kot amnhî nhîpêx tûm o awjanã nhûm Tirtûm tee ri ja hã mē omu nê mÿrapê tanhmã mē hipêx to. Tã nhûm Kraja kaxkwa rûm mē pahwÿr wrÿ nê mē pamã kapêr. Jakamã kwa mē okora kêr pu mē panhîgêjtjê pyrã nê mē pahte amnhî nhîpêx tûm o paxujanãr kêt nê. Kot puj mē anê nhûm Tirtûm ja hã mē pahpumu nê mē urak nê ja hã tanhmã mē panhîpêx to.

²⁶ Amnepê m Tirtûm kot hixêt prêk pê Sinai kamã mē kãm kapêrja. Na pre kapêr tÿx o pika ho àk nhûm htertet tÿx nê. Tã koja nhÿrmã axte pika ho àk nê kaxkwa ho àk nhûm wa hamê htertet tÿx kumrêx. Koja axte ho anhÿr ho pixi nê axte ho anhÿr kêt nê.

²⁷ Tã nhÿrmã axte mēmoj to àk ã amnhî jarênh jakamã koja mēmoj to kator xwÿnhnta piitã ho àk. Nê mē pahte panhîhkra ho mēmoj nhîpêx xwÿnhja nhûm ho àk nhûm htertet tÿx kãm hpigranh pa

nê hapêx. Nhũm mẽmoj htertet nê hpigrành kêt xwỳnh pixjaja arĩ rãhã ho rãhã.

²⁸ No Tĩrtũm nhõ krĩ koja htertet nê hapêx kêt nê. Nê mẽ papajaja mẽ pahpê hkra jakamã te ra kuri õ krĩ kamã ri mẽ papa pyræk. Jakamã kot puj mẽ mẽ uræk nê pajapêx kêt nê. Jakamã e kwa kêr pu mẽ amnhĩ tã Tĩrtũm mã mex o mex ã harênh nê hã pahpijaàm rãhã ho papa. Nê tanhmã amnhĩ tomnuj to hã amnhĩ pumu nê Tĩrtũm pumaj mẽmojta kaga kurê kumrêx. ã mẽ pahte amnhĩ nhĩpêx anhỹr o papaja na Tĩrtũm kãm hprãm.

²⁹ Hihtỳx o hihtỳx jakamã koja mẽmoj tã akamã gryk kot kaj amex kêt o amex kêt.

13

Mẽ pahte Tĩrtũm kãm hprãm xà hkôt amnhĩ nhĩpêx ã mẽ pamã karõ

Rõmãn 12.1-2; Epes 4.1-3; Korosẽ 1.10-11; Wam Tesarõn 4.1-12; Wam Pêtre 2.11-12; Wam Juãw 3.17-18

¹ Nê e kwa Kris kôt ixtõ nê ixtõxjaja. Kêr pu mẽ arĩ Kris kôt pahkwỳjê ho mex o mãn axpên kôt ri papa. Nê kêr pu mẽ tanhmã pahpunuj to hã amnhĩ pumunh tã axpên to mex mã panhũrer kêt nê. ã axpên nhĩpêx anhỹr rãhã ho papa.

² Nê amnepê mã na pre mẽmojaja nhỹhỹnh mra nê mẽ panhĩgêjtê hõ hwỳr pøj. Hãmri nhũm mẽ omu nê htỳx axtem krĩ hõ nhõ xwỳnh ã mẽ hkamnhĩx tã no nhũm mẽ kêp Tĩrtũm kapêr o mẽ wrỳk xwỳnh kwỳ na prem. Hãmri nhũm amnhĩ nhõrkwỹ hwỳr mẽ kuwỳ nhũm mẽ ma hkôt mra nê kuri pøj nê kutã apku. Jakamã kwa koja nhỹhỹnh

krĩ hõ rũm mẽmojaja ma mẽ awỳr mõ ka mẽ omu nẽ axàmnhĩx amnhĩ nhõrkwỹ hwỳr mẽ hwỳr kurê kumrêx kê mẽ ari pøj. ã mẽ hipêx anhỳr o apa hãmri nẽ nhỹrmã mẽ panhĩgêjtja pyrà nẽ amnhĩ wỳr Tĩrtũm kapêr o mẽ wryk xwỳnhjê hõ hwỳr japêr. Mẽ uràk nẽ ja hã mẽ omunh kêt tã atỳx amnhĩ wỳr mẽ awỳ nhũm ja mẽ amã mex o mex.

³ Nẽ kêr ka mẽ ra mẽ kot Jejus ã mẽ akwỳjê pynênh nẽ mẽ hagjênh xwỳnhjê mã ajamaxpêr rãhã ho ri apa nẽ mẽ ho ajamakêtkati hkêt nẽ. Te mẽ kajaja mẽ ìhkô hã mẽ hagjênh xà kamã apunuj nẽ akrĩ pyràk o mẽ kãm ajamaxpêr o ri apa. Jao mẽ kamã axukapri ho mẽ hwỳr mra nẽ mẽ kãm mẽmoj nhõr o ri apa.

⁴ Nẽ mẽ kot axpên to hprõja na mex. Nom kêr ka mẽ amyjaja ãm aprõ pix tãnopxar o ri apa. Nẽ mẽ anijaja mẽ ajaxwỳja amjên pix tãnopxar o ri apa. No mẽ hkuprỳjê hwỳr mẽ mrar xwỳnhjaja nẽ nhãm mẽ kêp mẽ hprõ ho amnhĩkati xwỳnhjaja nẽ nhãm mẽ kêp mẽ mjên o amnhĩkati xwỳnhjaja koja Tĩrtũm ja hã mẽ omu nẽ mẽ homnuj tỳx kumrêx.

⁵⁻⁶ Nẽ kêr ka mẽ akàxpore rũnh kêt ã amnhĩ pumu nẽ tee ri amnhĩ kukamã ajamaxpêr o akapri hkêt nẽ. Na pre Tĩrtũm mẽ pamã kapêr o:

Kot paj akôt ri ixpa rãhã ho ixpa nẽ aa arer rỳ akaga hkêt kumrêx.

Anhỳr jakamã kot kaj mẽ akàxpore grire htã akapri nẽ apa hkêt nẽ. Aa Tĩrtũm kot mẽ pahkaga hkêt ã amnhĩ jarênh jakamã mẽmoj kot pu wem omu nẽ pamã nhãm ri mẽ uma ho papa? Tĩrtũm kot mẽ pahkôt pa ho pa kênã. Jakamã na pu htem pajamaxpêr o:

Nà Pahi Maatija ra kot ixkôt pa ho pa xwýnh jakamã mẽmo kot pa hkêt ri inhmã uma ho ixpa?

Mẽmo kot kêt ri tanhmã kêp ixto?

Anhÿr o pajamaxpêr o papa.

⁷ Nê mẽ kot Kris mã mẽ ajamãr o mẽ pa xwýnh ra mẽ htyk xwýnhjaja ka mẽ arĩ mẽ kot tanhmã amnhĩ nhĩpêx to ho paja mã ajamaxpêr rãhã ho ri apa. Na prem Tĩrtũm kapêr o mẽ ajahkre mex nê. Nê tãm ri amnhĩ nhĩpêx o ri mẽ akôt pa. Nê amnhĩ kaxyw Tĩrtũm kôt pix mã hamaxpêr rãhã ty. Tã kêr ka mẽ uràk nê ã amnhĩ nhĩpêx anhÿr o ri apa rãhã ty.

⁸ Nê Jejus Krisja arĩ rãhãã. Nê amnepê mã kot amnhĩ nhĩpêxja mããnên arĩ rãhãã. Aa kot amnhĩ nhĩpêxja nhĩjuk ri axtem tanhmã amnhĩ nhĩpêx to hkêt.

⁹ Nê kwa kêr ka mẽ Tĩrtũm kôt amnhĩ nhĩpêx rãhã ho ri apa. Na hte kapêr o hêx xwýnhjaja mẽ awÿr mra nê mẽ amã:

—Amnepêm mẽ ate Tĩrtũm kot mẽ amex ã mẽ ajarênh kaxyw mẽ ate kãm mẽmo mry nhõr nê akupÿm hamýnh nê hkur o apa htã ra ja ho anhÿr kaga. Kwa mẽ ja ho awjanã nê axte ã amnhĩ nhĩpêx anhÿr o ri apa. Kê Tĩrtũm ja hã mẽ apumunh kôt mẽ amex ã mẽ ajarê.

Anhÿr o mẽ amã kapêr. Nom xà na hte Tĩrtũm ã mẽ pahte amnhĩ nhĩpêx anhÿr ã mẽ pahpumunh kôt mẽ pamex ã mẽ pajarê? Xà na htem mẽmo mẽ apkur xà hkur pê amnhĩ kaxyw Jejus kôt hamaxpêr tÿx o pa? Nà na htem anhÿr kêt nê. Na pu htem mẽmoj kur kôt pamã Tĩrtũm kĩnh kêt nê. Kêt mẽ paxàpkur xàja mẽ panhĩ pix o hihtÿx

kaxyw na. Na hte Jejus kôt mē pahto paxihtỳx kêt nē. Ām Tĩrtũm kot amarĩ kām mē pajapê nē mēmoj to mē pakutā nojarêt jakamā na pu htem ja hā amnhĩ pumu nē amnhĩ kaxyw hkôt pajamaxpēr tỳx o papa.

¹⁰ Tĩrtũmja Jejus kot mē panê htyk ā omunh xà hkôt ra kot mē pamex ā mē pajarēnh jakamā mo kaxyw kot pu mē axte kot mē pamex ā mē pajarēnh kaxyw kām mēmo mry gō nē hkwȳ hku? Koja mēhō akupỹm Tĩrtũm kapēr tũm o ujanār jao Jejus kot nē htyk nē hkamrô pikapĩrja kaga.

¹¹ Amnepēm na pre patre maatijsa tōhā mē kām mēmo mry hpar xwỹnh hkamrô ru nē guhkrax kām kuru nē hamỳ nē ma o mra nē Tĩrtũm nhōrkwȳ kaàkre hwỳr hitom maati hwỳr ho agjê. Tĩrtũm kot mē omunh nē axte mē kot amnhĩ tomnuj mǎ hamaxpēr kêt kaxyw. Hāmri nhũm hpānhā ĩ mỳ nē krĩ pē ho kato nē ma o mra nē nhỹri amỹm hkwȳjê hkàx ā ho hxêt pa. Tĩrtũm kapēr tũm kôt na prem ā amnhĩ nhĩpêx anhỹr o pa.

¹² Tǎ ja pyrà nē na prem ma krĩ pē amỹm Jejus o tē nē kupĩ nhũm hkamrô axkapĩ. Kot mē pahte amnhĩ tomnuj pānhā amnhĩrer nē mē pahto mē pahpê Tĩrtũm kra kaxyw ā htyk nē hkamrô pikapĩr anē.

¹³ Na prem Tĩrtũm kapēr tũm gryk ā Jejus kaga nē pōristijê mǎ anē nhũm mē ma krĩ pē ho kato nē o tē nē kupĩ. Tǎ kêr pu mē jajê rom Jejus gryk ā mǎn Tĩrtũm kapēr tũm kaga. Kwār mē māmri Jejus pyrà nē Tĩrtũm ā tanhmā mē pahto nē amnhĩ nē nhỹhỹm mē pajano.

¹⁴ Kêt jar mē papapxàja kêp mē papapxà kumrêx kêt. Nē jar mē panhō krĩja kêp mē panhō krĩ

kumrêx kêt. Mê pamã te kot pô nhĩrõnh o ixkre pix pyræk. No kêt mê panhõ krĩ kumrêx koja jar mê panhõ krĩ rom aa hapêx kêt nê. Tã tãm na pu mê kormã ma hwÿr papa kaxyw arĩ amnhĩ tã Tĩrtũm jamãr o papa.

¹⁵ Nê na htem Ijaew arĩ ohtô nê amnhĩ pãnhã Tĩrtũm mã mry hpar ho pa. Nom mê papajaja kot puj mê axte ã amnhĩ nhĩpêx anhÿr hkêt nê. Kot puj mê ãm Jejus kukwak ri Tĩrtũm mã mex o mex ã harênh rãhã ho mãn papa. Jao te mê pahte kãm hkĩnh xà nhõr pyræk o amnhĩ nhĩpêx.

¹⁶ Nê kêr pu mê arĩ axpên to mex o ri axpên kôt papa. Nê kê mēhõ kêp amrakati japêr ka ja hã omu nê amnhĩ kutã kãm anhõ mēmoj kwÿ. ã kot puj mê axpên nhĩpêx anhÿr rãhã ho ri axpên kôt papa. Kot puj mê anê nê te mê pahte Tĩrtũm mã hkĩnh xà nhõr pyræk o amnhĩ nhĩpêx. ã mê pahte amnhĩ nhĩpêx anhÿrja na mex o mex.

¹⁷ Nê kêr ka mê Kris kôt mê akrãhtũmjê kapêr ma nê mê hkôt amnhĩ nhĩpêx mex nê. Na htem Tĩrtũm mã mê ajamãr o ri mê akôt pa. Koja mê nhÿrmã mê kot tanhmã mê anhĩpêx to hã Tĩrtũm mã amnhĩ jarê. Jakamã mê kãm mê ato ajuta prãm. Tã kêr ka mê kapêr ma nê mê hkôt ri amnhĩ nhĩpêx mex o ri apa. Kêr kê mê amnhĩ tã mê apumu nê hkĩnh nê. No kot kaj mê ama nê ãm mê ama nhũm mê tee ri amnhĩ tã mê apumu nê hkaprĩ nê. Jao tee ri kot tanhmã mê ato ajuta mex to hkukamã hamaxpêr.

¹⁸ Nê kwa kêr ka mê ixto Tĩrtũm wÿr rãhã ho apa. Inhmã Tĩrtũm noo mã tanhmã amnhĩ tomnuj to hprãm kêt. ãm inhmã amnhĩ to mex pix o ri ixpa hprãm.

19 Nê kêr ka mē ixto awyê kê tokyx akupÿm mē awyêr inhmê. Na pa ra inhmã mē apumunh prãm tÿx nê.

Kagà nhîpêx xwÿnh kot tanhmã mē ho Tîrtÿm wÿr to hã harênh

Epes 3.14-19; Piripos 1.0-11; Wam Tesarôn 3.9-13, 5.23; Sikÿn Tesarôn 1.11-12, 2.16-17

20 Nê mē panhõ Pahihti Jejus Krisja na hte mē panhîpêx o te ôwêhti jamãr xwÿnh kot hkrit jamãr pyrãk o pa. Jakamã kêp mē pajamãr xwÿnh maati mex na. Na pre mē panê ty nhÿm Tîrtÿm akupÿm mē pamã ho htîr nê mē pamã harênh o:

—E ra Ixkra kot mē anê htyk jakamã kêr ka mē ãm ixkapêr nyw kôt pix mã ri amnhî nhîpêx o ri apa. Kot kaj mē ã amnhî nhîpêx anê hãmri nê nhÿrmã ty pa akupÿm mē ato mē atîr ka mē ixri atîr tÿm nê apa ho apa. Anê.

Tîrtÿm kêp mē pahto mē pajamakêtkati nê ri mē papa xwÿnh na.

21 Tã na pa hte tanhmã mē ato hwÿr to ho ixpa nê mē ato hwÿr o:

—Pa Tîrtÿm. E kwa tanhmã ixkwÿjê ho mex to kê mē kãm akapêr kôt pix mã amnhî nhîpêx o pa hprãm. Nê mē kãm tãm amnhî nhîpêx o pa hprãm. Nê kê Jejus haxwÿja tanhmã mē ho mex to kê mē war amã hprãm xã hkôt pix mã war amã tanhmã ri amnhî nhîpêx to ho pa. Anê.

E kêr pu mē arî Jejus Kris mã mex o mex ã harênh rãhã ho papa.

Kagà jatur xã kamã mēmoj jarênh

22 E Kris kôt ixkrãmnhwÿjaja. Nà na pa ã mē amã kagà nhîpêx anê. Jejus kôt mē ato mē axihtÿx

kaxyw. No na pa ho ry nê hipêx kêt nê. Ixte ho grire nê hipêx jakamã kwa kêr ka mē kamã harê nê mar tỳx nê hkôt amnhĩ nhĩpêx mex o ri apa.

²³ Nê mãn ka mē ra Ximotre jarênh mar japêr. Na pre Kris ã mē hagiênh xà kamã hkrĩ hã apkati xohtô nê. Tã nhũm xep mē ra kator. Tã koja kormã mē awỳr inhmõr xwỳj ri man ixwỳr mō nê hpôx japêr kot paj ma amnhĩ kôt mē awỳr o mō ka mē omu.

²⁴ Nê kêr ka mē kot Kris mã mē ajamãr xwỳnhjê mã ijarê. Nê atar Tĩrtũm krajê piitã mē kãm ijarê. Nê ota jar Tĩrtũm kra hkwỳja piitã mē awỳr hpêr mē.

²⁵ E kê Tĩrtũm mē apiitã mē ato mex o pa. Tã ãm ja pix. Na pa ã mē amã hã kagà ho anê. Na hapêx.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files
dated 29 Jan 2022

383a4e22-34cd-505f-9cc2-2f9921e7aa9f